

**Inuussutissarsiutinik ingerlatsisutut aningaasaateqarfiit pillugit allannguutitut
inatsisini assigiinngitsuni aalajangersakkat ilaasa Kalaallit Nunaannut
atuutilersinneqarnerat pillugu peqqussut pillugu nalunaarut**

Inuussutissarsiutinik ingerlatsisutut aningaasaateqarfiit pillugit allannguutitut inatsisini assigiinngitsuni aalajangersakkat ilaasa Kalaallit Nunaannut atuutilersinneqarnerat pillugu peqqussut nr.485 14. maj 2018-meersoq, aamma peqqussut nr. 2626 28. december 2021-meersoq malillugit aalajangerneqarpoq:

Kapitali 1

Peqqussutip atuuffia il.il.

Atuuffia

§ 1. Peqqussut aningaasaateqarfinnut, legatinut, iluaqutissiuusunut suliffeqarfinnullu allanut imminnut pigisunut, § 2 malillugu inuussutissarsiornermik ingerlatsisutut isigineqartunut (aningaasaateqarfinnut inuussutissarsiutitut ingerlatanut) atuutissaaq.

Imm. 2. Peqqussummi matumani aningaasaateqarfiit inuussutissarsiutitut ingerlatat pineqarneranni inatsisitigut pisinnaatitaasut pisussaatitaasullu, pilersitsisup aningaasaataanut utertinneqarsinnaanngitsunik aningaasaatinik, malittarisassat malillugit siunertamut ataatsimut siunertanulluunniit arlaqartunut, ukiuni amerlasuuni malinneqarsinnaasussanut aalajangersimasunut atorneqartussanik pigisaqartut pineqartarput, aningaasaateqarfirmillu atuisinnaaneq pilersitsisumut naleqqiullugu aqutsisunit namminersortunit inuussutissarsiornermik ingerlatsisunit ingerlanneqarpat, tak § 2, imm. 1 aamma 2, aningaasaateqarfiullu aningaasaataanik inuit imaluunniit inatsisitigut pisinnaatitaasut pisussaatitaasullu aningaasaateqarfiup avataaniittut aningaasaateqarfiup aningaasaataanik piginnittuunissamut pisinnaatitaaffeqartussaananik.

Imm. 3. Aningaasaateqarfirmut tunissuteqartartut, tapiissuteqartartut assigisaalluunniit peqqussummut matumunnga atatillugu sutigut tamatigut aningaasaateqarfiup pilersitsisuanit sanilliunneqartassapput.

§ 2. Aningaasaateqarfik peqqussut manna malillugu inuussutissarsiutitut ingerlanneqartutut isigineqassaaq, imaappat

- 1) nioqqutissanik pisinnaatitaaffinnilluunniit tigussaannigitsunik tunniussisarpas, sullissisarlu assigisaanilluunniit iliortarluni, taakkulu nalinginnaasumik akissarsissutigisarlugit,
- 2) pigisanik aalaakkaasunik tuniniaasarnermigut attartortitsisarnermigulluunniit sulinermik ingerlataqaruni, imaluunniit
- 3) piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi § 7-mi taaneqartutut aktianik piginneqatigiiffimmut anpartsselskabimulluunniit, imaluunniit suliffeqarfimmut allamut attuumassuteqaruni.

Imm. 2. Aningaasaateqarfiulli suliaq ingerlataa, imaluunniit imm. 1, nr. 3-mi taaneqartutut attuumassutaa killeqarpat, imaluunniit aningaasaateqarfiup aningaasaataanut tamarmiusunut naleqqiullugu pingaaruteqanngitsumik annertussuseqarpat, aningaasaateqarfik inuussutissarsiutitut ingerlatatut isigineqassanngilaq.

Imm. 3. Aningaasaateqarfiit inuussutissarsiutitut ingerlannerata qaqugukkat killeqartutut isigineqarnissaa imaluunniit aningaasaateqarfiup aningaasaataasa ilaannik annikitsuinnarmik ilaqartutut isigineqarnissaa pillugu maleruagassanik erseqqinnerusunik Erhvervsstyrelsi aalajangersaasinnaavoq.

§ 3. Peqqussummut ilaangillat

- 1) Danmarkip Nationalbankia,
- 2) aningaasaateqarfiit inatsisikkut imaluunniit inatsit malillugu pilersitat imaluunniit Kalaallit Nunaanni naalagaaffimmilu allami inuinnaat akornanni isumaqatigiissuteqarnikkut pilersitat, naalagaaffiillu arlaannit nakkutigineqartut,
- 3) aningaasaateqarfiit, kommunip nunalluunniit immikkoortuata isumaginninnermut inatsisit malillugit pisussaaffiisa eqqortinneqarnissaannut kommunimut nunalluunniit immikkoortuanut isumaqatigiissuteqarsimasut, suliaassanik allanik annertuunik aningaasaateqarfik suliaqanngippat, imaluunniit
- 4) aningaasaateqarfiit, akuerisaanissamut imaluunniit pisortanit tapiiffigineqarnissamut piunasaqaatit inatsisit allat imaluunniit inatsisit allat malillugit aalajangersakkat malillugit pisortat oqartussaasuinit nakkutigineqartut aningaasaqarnikkullu nakkutigineqarlutik.

Imm. 2. Aningaasaateqarfiup peqqussut manna malinnagu allatigulli pisortanit nakkutigineqartup aningaasaqarnikkullu nakkutigineqartup, peqqussummik matuminnga tamakkiisumik ilaannakortumilluunniit malitsinnginnissaa aningaasaateqarfinnut oqartussat aalajangersinnaavaat. Aningaasaateqarfimmik pilersitsisoq nakkutilliinnermut oqartussaasuuppat, aningaasaateqarfiup peqqussummit matumannga ilaatinngitsoorneqarsinnaanngilaq.

Stk. 3. Imm. 2 malillugu peqqussummut ilaatinneqanngitsut imaluunniit imm. 1 malillugu peqqussummi suliaasaqarfiup avataaniittunut aningaasaateqarfinnut piginnittuiusunik nalunaarsuineq pillugu § 21 a atuuppoq.

§ 4. Aningaasaateqarfik peqqussummut matumunnga ilaassanersoq nalornissutigineqartillugu, Erhvervsstyrelsi aalajangiisuussaaq.

Aningaasaateqarfiit inuussutissarsiutitut ingerlatat aqqi

§ 5. Aningaasaateqarfiit inuussutissarsiutitut ingerlatat aterminni oqaaseq aningaasaateqarfik atussavaat.

Imm. 2. Taaguut aningaasaateqarfik inuussutissarsiutitut ingerlataq imaluunniit inuussutissarsiornermut aningaasaateqarfik imaluunniit naalisaaneq ERF taamaallaat aningaasaateqarfimmit § 12, imm. 1 malillugu nalunaarsugaasumit imaluunniit nalunaarsugassatut nalunaarutigineqartumit atorneqarsinnaavoq.

Imm. 3. Ateq aningaasaateqarfiit suliffeqarfiillu allat, Erhvervsstyrelsen qarasaasiaqarfiani nalunaarsugaasut aqqinit erseqqissumik allaanerussaasut, paatsuugassaassanilu. Ilaqutariit aqqi, suliffeqarfiit aqqi, pigisap aalaakkaasut aqqa immikkuullarissut, nioqqutissanut ilisarnaat, niuernermut ilisarnaat assigisaalluunniit, aningaasaateqarfiup susassarinnngisai, imaluunniit taakkuusorineqarsinnaasut atermut pisussaaffiginagu ilanngunneqassanngillat.

Imm. 4. Aningaasaateqarfiit allakkani sulinermullu atatillugu pappialani allani, ilanngullugit qarasaasiakkut nalunaarutiminni aamma aningaasaateqarfiup qarasaasiakkut nittartagaani ateq, angerlarsimaffik kiisalu Erhvervsstyrelsen qarasaasiaqarfiani nalunaarsugaanermut normu allassimassavaat.

Imm. 5. Saniatigut taaguutinut imm. 1-4 assigisaanik atorineqassapput.

Piginneqatigiiffissuit

§ 6. Aningaasaateqarfik § 2, imm. 1, nr. 3-mut ilaasut aningaasaateqarfittut piginnittutut isigineqassasut, aktianillu piginneqatigiiffik imaluunniit andelselskabi imaluunniit taakku arlaqartut aningaasaateqarfiup taaneqartutut atassuteqarfigisai suliffeqarfittut pigisatut isigineqassapput.

Imm. 2. Aningaasaateqarfik piginnittoq suliffeqarfik imaluunniit suliffeqarfiit pigisani peqatigalugit piginneqatigiiffissuuvut. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutilersinneqartumi § 7-imi tunngavik ataaseq arlaqartulluunniit aningaasaateqarfiit arlaqartut eqqortippasut, tak. peqqussummi matumani § 2, imm. 1 nr. 3, taamaallaat aningaasaateqarfik suliffeqarfiup aningaasaqarnikkut ingerlatsinikkullu aalajangiisarnernut aalajangiisumik sunniuteqartoq aningaasaateqarfittut piginnittutut isigineqassasut.

Pigisanik agguassinermut eqqartuussiviup aamma Sø- og Handelsrettens pisinnaatitaaffii

§ 7. Inatsit manna malillugu pisinnaatitaaffiit pigisanik agguassinermut eqqartuussivimmut tunniunneqarsimatillugit, pineqartut Kalaallit Nunaanni eqqartuussivimmit suliarineqassapput.

Kapitali 2

Attaveqatigiinneq

§ 8. Pissutsit peqqussummut matumunnga imaluunniit peqqussut manna malillugu aalajangersakkanut ilaasut pillugit Erhvervsstyrelsimut tassungalu allakkatigut attaveqatigiinnerit tamarmik digitalimik ingerlanneqarnissaat pillugu maleruagassanik inuussutissarsiornermut ineriartortitsinermullu ministeri aalajangersaasinnaavut.

Imm. 2. Digitalimik attaveqatigiinneq pillugu maleruagassanik erseqqinnerusunik inuussutissarsiornermut ineriartortitsinermullu ministeri aalajangersaasinnaavut, it-mi periutsit aalajangersimasut, digitalimik ilusiliinerit aalajangersimasut, digitalimik atsiornert assigisaasaluunniit atorineqarnissaat ilanngullugu.

Imm. 3. Digitalimik nalunaarut nalunaarummik tiguisussamit tiguneqarsinnaasunngoruni, apuussimasutut isigineqassasut.

Imm. 4. Pissutsit peqqussummut matumunnga imaluunniit maleruagassanut peqqussut manna malillugu aalajangersagaasunut ilaasut pillugit allakkatigut Civilstyrelsimut tassungalu attaveqatigiinnerit tamarmik digitalimik pinissaat pillugu inuussutissarsiornermut ineriartortitsinermullu ministeri inatsisinik atuutsitsinermut ministerimut isumaqatigiinniarnernigut aalajangersaasinnaavut. Imm. 2 aamma 3 tamatuma assigisaanik malinneqassapput.

§ 9. Peqqussut manna imaluunniit aalajangersakkat peqqussut manna malillugu aalajangersagaasut malillugit aalajangiinernik uppersaaititullu allakkianik allanik atsiorneqanngitsunik, aalajangiinermik imaluunniit uppersaaititut allakkiamik kiap nassiussisuunerata paatsuugassaanngitsumik paasinissaanut qulakkeerinnittumik maskinakkut assigisaanilluunniit periuseqarluni assilisamik atsiugaasunik Erhvervsstyrelsen nassiussisinaanera pillugu maleruagassanik inuussutissarsiornermut ineriartortitsinermullu ministeri aalajangersaasinnaavoq. Aalajangiinerit uppersaaititullu allakkiaat taamatut ittut aalajangiinernut uppersaaititullu allakkianut nammineerluni atsiugaasunut nalogiissinneqarput.

Imm. 2. Aalajangiinerit uppersaaititullu allakkiaat, taamaallaat elektronik atorlugu paasissutissanik suliarinninneq tunngavigalugu aalajangigaasut imaluunniit allakkiaasut, taamaallaat Erhvervsstyrelsen nassiussisutut taallugu suliarineqarsinnaanerata pillugu maleruagassanik inuussutissarsiornermut ineriartortitsinermullu ministeri aalajangersaasinnaavoq.

Imm. 3. Inuussutissarsiornermut ineriartortitsinermullu ministeri inatsisinik atuutsitsinermut ministerimut isumaqatigiinniareernermigut Civilstyrelsen maleruagassanik imm. 1-ip 2-llu assigisaannik aalajangersaasinnaavoq.

§ 10. Allakkiap Erhvervsstyrelsen Civilstyrelsimilluunniit suliarineqarani allamit suliarineqartup peqqussut manna imaluunniit peqqussut manna malillugu aalajangersakkat malillugit atsiorneqarsimanissaa piumasaqaatigineqarpat, periutsumik uppersaaititut allakkiamik suliarinnittup kinaanerata paatsuugassaanngitsumik paasineqarnissaanut qulakkeerinnittumik atuinnikkut piumasaqaat eqqortinneqarsinnaavoq, taamaattoq tak. imm. 2. Uppersaaititut allakkiaat taamatut ittut uppersaaititut allakkianut inummit atsiugaasunut nalogiissinneqarput.

Imm. 2. Inuussutissarsiornermut ineriartortitsinermullu ministeri inatsisinik atuutsitsinermut ministerimut isumaqatigiinniareernermigut atsiortoqarsimanissaanik piumasaqaatip avaqqunneqarsinnaaneranut maleruagassanik erseqqinnerusunik aalajangersaasinnaavoq. Uppersaaititut allakkiaat ilaannut aalajangersimasunut inuttut atsiortoqarsimanissaanik piumasaqaatip avaqqunneqarsinnaannginnera ilanngullugu aalajangersarneqarsinnaavoq.

Kapitali 3

Nalunaaruteqarneq, nalunaarsuineq piffissaliussallu

Nalunaaruteqarneq nalunaarsuinerlu

§ 11. Aningaasaateqarfiit inuussutissarsiutitut ingerlatat, nalunaarummut matumunnga ilaasut taannalu malillugu nalunaarsugaasut pillugit Erhvervsstyrelsen nalunaarsuinerimut oqartussaasutut nalunaarsuiffimmik ingerlataqassaaq. Peqqussut manna malillugu nalunaarsuineq tamanullu saqqummiussineq Erhvervsstyrelsen qarasaasiaqarfia atorlugu pissaaq.

Imm. 2. Paasissutissat Erhvervsstyrelsen qarasaasiaqarfiaatigut tamanut saqqummiunneqartut allanik ilisimaneqalersutut isigineqarput. Erhvervsstyrelsen qarasaasiaqarfiaatigut tamanut saqqummiussisimatinnani, pissutsit nalunaarsugassat tamanullu saqqummiussassat allamut atuuttussanngortinneqarsinnaanngillat, aatsaat pineqartoq taakkuninnga ilisimannissimasoq uppersarsinnaagaanni. Pissutsit taamatut ittut suli saqqummiunneqarsimannginnerisa allat pissutsinik atuutsisisinaanerat ajornarsisinngilaa.

Imm. 3. Nalunaarsuinerimut nalunaaruteqarnernulluunniit atatillugu uppersaaititut allakkianut oqaatsitigut piumasaqaatit pillugit maleruagassanik Erhvervsstyrelsen aalajangersaasinnaavoq.

Imm. 4. Ukiumoortumik nalunaarusiap tuluttut suliarineqarnissaanut maleruagassanik erseqqinnerusunik Erhvervsstyrelsen aalajangersaasinnaavoq.

§ 12. Paasissutissat peqqussut manna malillugu pinngitsoorani nalunaarsugassat, inatsisitigut pisussaalersitsisumik aalajangernerup imaluunniit pissutsit allanngornerisa kingusinnerpaamik sapaatit akunnerisa tallimat kingorna Erhvervsstyrelsen qarasaasiaqarfianut ilanngunneqarsimassapput, peqqussut manna malillugu allamik aalajangiisoqarsimanngippat. Nalunaaruteqartoq Erhvervsstyrelsen qarasaasiaqarfianut nammineerluni nalunaarsuinngippat, tak. § 19, imm. 1, inatsisitigut pisussaalersitsisumik aalajangernerup imaluunniit pissutsit allanngornerisa kingusinnerpaamik sapaatit akunnerisa tallimat kingorna Erhvervsstyrelsen qarasaasiaqarfianit tiguneqareersimassapput.

Imm. 2. Nalunaarsuinissaq siunertaralugu Erhvervsstyrelsimut nalunaarsuinnermut oqartussaasutut nalunaaruteqareeraanni, ilumut nalunaarsuisoqarnissaa imaluunniit nalunaarutiginnissaa qulakkiissallugu siulersuisut pisussaaffigaat.

Imm. 3. Uppernarsaatitut allakkianut nalunaarutinullu il.il. Erhvervsstyrelsen qarasaasiaqarfianut tamanut saqqummiunneqartussanut imm. 1 aamma 2 tamanut saqqummiussinnermi assigisaanik atorineqassapput. Nalunaaruteqartoq Erhvervsstyrelsen qarasaasiaqarfianut nammineerluni nalunaarsuinngippat, tak. § 19, imm. 3, pisup pineqartup pinerata kingusinnerpaamik sapaatit akunnerisa tallimat kingorna Erhvervsstyrelsen qarasaasiaqarfianit tiguneqareersimassaaq.

Imm. 4. Piffissaliussat peqqussummi matumani aalajangersagaasut sivitsorneqarnissaat Erhvervsstyrelsen nalunaarsuinnermut oqartussaasutut akuersissutiginnavaa.

§ 13. Siulersuisunut pisortaanernullu ilaasortat kiisalu kukkunersuiisoq Erhvervsstyrelsen qarasaasiaqarfiani nalunaarsorneqassapput.

Imm. 2. Suliap naammassinnginnerani kukkunersuiisut nikisinneqarpata taarsiisoqarpata, imaluunniit siulersut kukkunersuiisullu akornanni isumaqatigiinnginnerit kukkunersuiisup taarserneranut pissutaappata, suliap unitsinneqarneranut pissutaasoq pillugu siulersuisut sukumiisumik nassuiaataat nalunaarsuinnermut imaluunniit nalunaarsuinissamut nalunaarummut, tak. § 12, imm. 1, ilanngunneqassaaq.

Imm. 3. Pilersitsisut nalunaarsorneqarnissaannut maleruagassanik Erhvervsstyrelsi aalajangersaasinnaavoq.

§ 14. Pilersitsinnermi imaluunniit tunngaviusumik aningaasaatit amerlisinneranni, aningaasaateqarfiup tamatumunnga atatillugu aningaasartuutai pillugit paasissutissat nalunaarsuinnermut imaluunniit nalunaarsuinissamut nalunaarummut, tak. § 12, imm. 1, ilanngunneqassapput.

§ 15. Pissutsit nalunaarsorneqartussatut kissaatigineqartut peqqussummi matumani aalajangersakkanik imaluunniit peqqussut manna malillugu aalajangersakkanik imaluunniit malittarisassanik eqqortitsinnngippata, nalunaarsorneqassanngillat. Aammattaaq aalajangerneq nalunaarsuinissamut tunngavigineqartoq peqqussummi matumani imaluunniit peqqussut manna malillugu aalajangersakkanut imaluunniit malittarisassanut naapertuutinngippat, nalunaarsuisoqassanngilaq.

Imm. 2. Nalunaaruteqartoq, pissutsinik Erhvervsstyrelsen qarasaasiaqarfianut nalunaarsuisoq, imaluunniit Erhvervsstyrelsen qarasaasiaqarfianut nalunaarsugassanngorlugu tamanna pillugu nalunaarummik nassiussisoq, nalunaarsuinnerup nalunaaruteqarnerulluunniit inatsisit malillugit pinissanut akisussaavoq, aamma piginnaatitsissutip pisariaqartinneqartup ilaatinissaa, kiisalu nalunaarsuinnermut nalunaaruteqarnermulluunniit atatillugu uppersaait atorsinnaanerit ilanngullugit.

Imm. 3. Uppernarsaatitut allakkianut il.il. peqqussut manna malillugu Erhvervsstyrelsen qarasaasiaqarfianut tamanut saqqummiunneqartunut, imaluunniit tamanut

saqqummiunneqartussanngorlugit Erhvervsstyrelsimut nassiunneqartunut imm. 1 aamma 2 assigisaanik atorneqassapput.

§ 16. Nalunaarut kukkuneq imaluunniit amigaateqarnera pissutigalugu nalunaarsorneqarsinnaanngippat, Erhvervsstyrelsi nalunaarsuinnermut oqartussatut iluarsiiissuteqarnissamut piffissaliussamik aalajangersaasinnaavoq. Piffissaliussatut aalajangerneqartoq qaangiutsinnagu iluarsiiissuteqartoqanngippat, nalunaarsuinissaq itigartitsissutigineqassaaq.

Imm. 2. Nalunaarsuineq imm. 1 malillugu itigartitsissutigineqarpat, nalunaarsuisoqannginnissaa tamatumunngalu tunngavilersuutit pillugit nalunaaruteqartoq allakkatigut nalunaarfigineqassaaq.

§ 17. Nalunaarsuinissamut piumasaqaatit eqqortinneqarsimanerisa nalilernissaanut paasissutissat pisariaqartinneqartut Erhvervsstyrelsip nalunaarsuinnermut oqartussatut piumasaqaatigisinnaavai.

Imm. 2. Maleruagassat kapitali manna malillugu aalajangersagaasut malillugit nalunaaruteqarnermi nalunaarsuinnermilu, nalunaarsuinnerup nalunaaruteqarnerulluunniit inatsisit malillugit pisimanera pillugu uppersaatinik nassiussisoqarnissaa Erhvervsstyrelsip nalunaarsuinnermut oqartussatut nalunaarsuinnermiit nalunaaruteqarnermiilluunniit ukiut pingasut tikillugit piumasaqaatigisinnaavaa. Nalunaarsuinnermut nalunaaruteqarnermulluunniit atatillugu aningaasat sumut atorneqarneranni inatsisinik malinnittoqarsimanera pillugu kukkunersuiusumit akuerisaasumit nalunaarummik nassiussisoqarnissaa Erhvervsstyrelsip nalunaarsuinnermut oqartussatut pisuni immikkut ittuni tamatumunnga atatillugu piumasaqaatigisinnaavaa. Oqaaseqatigiit siulliit aappaallu malillugit piumasaqaatit eqqortinneqanngippata, pissutsit iluarsineqarnissaanut piffissaliussamik Erhvervsstyrelsi nalunaarsuinnermut oqartussatut pisup iluarsiiiginissaanut piffissaliussamik aalajangersaassaaq. Piffissaliussatut aalajangersagaasoq qaangiutsinnagu iluarsiiisoqanngippat, aningaasaateqarfiup §§ 115-117-imi maleruagassat malillugit pinngitsaaliissummik atorunnaarsinneqarnissaa Erhvervsstyrelsip pisariaqarpat sulissutigisinnaavaa.

Imm. 3. Peqqussummi matumani aalajangersakkanik imaluunniit peqqussut manna malillugu aalajangersakkanik imaluunniit malittarisassanik unioqqutitsisoqartillugu, pissutsit peqqussummut matumunnga imaluunniit peqqussut malillugu aalajangersakkanut imaluunniit malittarisassanut naapertuuttunngorteqqullugit Erhvervsstyrelsip nalunaarsuinnermut oqartussatut siulersuisunut, pisortaanernut imaluunniit kukkunersuiusumut peqqussutigisinnaavaa.

§ 18. Erhvervsstyrelseni allamik aalajangigaqanngippat manna peqqussut naapertorlugu nalunaarsorneqarsimasut inuit aqqi pillugit paasissutissiineq Qitiusumik Suliffeqarfiit Nalunaarsuivianni qaqugukkulluunniit tamanut nalunaarutigineqassapput. Tamanna inuussutissarsiutigalugu aningaasaateqarfinnut ingerlasunut aamma uninnikunut atuuppoq.

Imm. 2. Manna peqqussut naapertorlugu inuit nalunaarsorsimasut najugaat pillugit paasissutissiinerit, inuup pineqartup, Qitiusumik Suliffeqarfinnik Nalunaarsuivimmi nalunaarsorsimasumi suliffeqarfinni suliuinnaarsimaneraniit ukiut tallimat ingerlareerserlugit Qitiusumik Suliffeqarfinnut Nalunaarsuivimmii tamanut nalunaarutigineqartassapput. Tamanna suliffeqarfinnut ingerlasunut unereernikunullu atuuppoq. Qitiusumik Inunnik Nalunaarsuivimmi atermik- aamma najukkamik

illersorneqarnermik nalunaarsoqqasunut, inuup najukkami illersorneqarnerata Qitiusumik Suliffeqarfinnik Nalunaarsuivimmi atuutinnginnissaa pillugu Erhvervsstyrelseni noqqaassuteqarfiginngippagu, Qitiusumik Inunnik Nalunaarsuivimmi illersorneqarnej atuutsillugu, Qitiusumik Suliffeqarfinnik Nalunaarsuivimmi najugaq tamanut nalunaarutigineqassanngilaq. Inuit inuup normuanik pigisaqanngitsut Qitiusumik Suliffeqarfinnik Nalunaarsuivimmi najukkap illersorneqarnissaa pillugu Erhvervsstyrelseni noqqaassuteqarfigisinnaavaat.

Imm. 3. Imm. 2-mi 4. pkt. naggatit sisamaanni allassimasut naapertorlugit inunnut inuup normuanik pigisaqanngitsunut najukkamik illersuinermit aamma najukkanik illersugaasunik ingerlatitseqqiinerlut periarfissat piumasaqaatillu sukumiinerusut Erhvervsstyrelsen-ip aalajangersussavai.

Imm. 4. Tamakkiisumik akisussaaffillit peqataasut, piginnittuusut aamma aqutsisunut ilaasortaasut imm. 1-imut aamma 2-mut ilaatinneqartut pillugit inuttut paasissutissanik nutarterineq, Qitiusumik Suliffeqarfinnik Nalunaarsuivimmi nalunaarsorneqartumi suliffeqarfimmi inuup pineqartup suliunnaarnerata ukiut tallimat kingorna atorunnaartarpoq.«

Nalunaarsuineq il.il. pillugit aalajangersakkat immikkut ittut

§ 19. Nalunaaruteqartoq peqqussut manna imaluunniit peqqussut manna malillugu aalajangersakkat malillugit nammineerluni nalunaarsuippat, nalunaarsuinerit taamatut ittut nalunaarutininik nassiussinermit taarsiullugu atuutilissapput.

Imm. 2. Peqqussut manna malillugu pissutsit pinngitsoorani nalunaarsugassat nalunaarutiginnissaat nalunaarsorneqarnissaalluunniit pillugit maleruagassanik Erhvervsstyrelsi aalajangersaassaaq.

Imm. 3. Nalunaarsuinerit, uppersaaitut allakkiat nalunaarutillu il.il. peqqussut manna malillugu Erhvervsstyrelsi qarasaasiaqarfiatigut tamanut saqqummiunneqartussat saqqummiunneqarnissaat pillugu maleruagassanik Erhvervsstyrelsi aalajangersaassaaq.

Imm. 4. Nalunaaruteqarnermit, pappialanngortitsinerlut il.il. nalunaarummut, uppersaaitut allakkiat assilinerarnerlut, Erhvervsstyrelsi qarasaasiaqarfianik atuinermut kiisalu kingusinaarluni akiliinermit akileeqqusissutitut akiliutit pillugit maleruagassanik Erhvervsstyrelsi aalajangersaasinnaavoq. Aammattaaq peqqussut manna malillugu allaffissornikkut ingerlatsinermit aningaasartutit matussusernissaannut aningaasaateqarfiit ataasiakkaat akiliuteqartarnissaat pillugu maleruagassanik Erhvervsstyrelsi aalajangersaasinnaavoq.

§ 20. Paasissutissat, aningaasaateqarfinnut oqartussanit pigineqartut tamanut saqqummiunneqannginnissaat pillugu maleruagassanik inuussutissarsiornermut ineriartortitsinermit ministeri aalajangersaasinnaavoq.

§ 21. Arlaat isumaqarpat nalunaarsuineq imminermut ajoqutaasoq, nalunaarsuinerup peerneqarnissaanik apeqqut eqqartuussivinnit aalajangiiffigineqassaaq.

Imm. 2. Tamanna pillugu suliaq nalunaarsuinerup Erhvervsstyrelsi qarasaasiaqarfiatigut tamanut saqqummiunneqarneraniit kingusinnerpaamik qaammatit arfinillit qaangiunneranni aningaasaateqarfik akerleralugu suliaassiissutigineqassaaq. Eqqartuussutit allaganngortinneqarneranik eqqartuussivik Erhvervsstyrelsimut nalunaarsuinermit oqartussaasumut nassiussissaaq, tamatumalu kingorna Erhvervsstyrelsi suliaq inernera pillugu paasissutissat Erhvervsstyrelsi qarasaasiaqarfiatigut tamanut saqqummiutissallugit.

§ 21 a. Piginnittuisut pisinnaatitaaffii pillugit paasissutissat ilaatillugit, aningaasaateqarfiup piginnittui pillugit paasissutissanik aningaasaateqarfik katersissaaq.

Imm. 2. Aningaasaateqarfiup piginnittuui, aningaasaateqarfiup noqqaassuteqarneratigut aningaasaateqarfik, aningaasaateqarfiup piginnittuui pillugit paasissutissanik, ilaatillugit, aningaasaateqarfiup katersussallugit pisussaanermisut, piginnittuut pisinnaatitaaffii pillugit paasissutissanik pilersussavaa.

Imm. 3. Inuk piginnittuinngorsimasoq aningaasaateqarfiup ilisimalersimanerata kingorna, piaarnerpaamik. ilaatillugit piginnittuut pisinnaatitaaffii pillugit paasissutissat, Erhvervsstyrelsenip it-kkut atortorissaarutaani, aningaasaateqarfiup piginnittuui pillugit paasissutissat aningaasaateqarfiup nalunaarsussavai. Piginnittuut pillugit nalunaarsukkani paasissutissani allannguut sunaluunniit, aningaasaateqarfiup allannguummik ilisimasaqalernerata kingorna piaarnerpaamik nalunaarsorneqassaaq.

Imm. 4. Piginnittuut pillugit paasissutissat nalunaarsukkat allannguuteqarsimanersut, aningaasaateqarfiup minnerpaamik ukiumut ataasiarluni misissortassavaa. Aningaasaateqarfiup ukiumoortumik naatsorsuutit pillugit ataatsimiinnerini ukiumoortumik misissuinerup inernerat saqqummiuttassavaa.

Imm. 5. Piginnittuunerup uninnerata kingorna ukiuni tallimani aningaasaateqarfiup piginnittuui pillugit paasissutissanut katersukkanut uppersaartit aningaasaateqarfiup toqqorsivimmiitissavai. Aammattaaq kinaassusersiniaanermut misiliinerup naammassinerata kingorna ukiuni tallimani piginnittuut kinaassusersiniarnerannut misiliineq pillugit paasissutissanut katersukkanut uppersaartit aningaasaateqarfiup toqqorsivimmiitissavai.

Imm. 6. Aningaasaateqarfiup piginnittuui pillugit paasissutissat qinnuteqartoqarneratigut aningaasaateqarfiup, ilaatillugit aningaasaateqarfiup piginnittuunik kinaassusersiniarnermik aningaasaateqarfiup misiliisimanera pillugu, politinut aamma unnerluussisussaataasunut tunniutissavai. Aammattaaq aningaasaateqarfiup paasissutissat eqqaaneqartut qinnuteqartoqarneratigut allanut piginnaatitaasut oqartussaasunut, taakkua oqartussaasut nakkutilliinerminnik- imaluunniit misissuinerminnik isumaginninnissamut pisariaqartut nalilerpassuk, tunniutissavai.

Imm. 7. Politit, unnerluussisussaataasut aamma allat piginnaatitaasut oqartussaasut akissarsissutaanngitsumik imm. 6 naapertorlugu katersukkat imaluunniit imm. 3 naapertorlugu nalunaarsugaasut piginnittuut pillugit paasissutissat EU-mi naalagaaffiit ilaasortaasut allat piginnaatitaasuut oqartussaasunut aamma aningaasalersuinerup isertortumik paasiniaasartuut ingerlateqqissinnaavaat.

Imm. 8. Ilaatillugit styrelsenip qarasaasiaqarfiani paasissutissat suut aningaasaateqarfiup nalunaarsussanera, Erhvervsstyrelsenip it-kkut atortorissaarutaani imm. 1, 3 aamma 5 malillugit paasissutissat nalunaarsorneri, pissarsiareriaannaaneri aammalu tamanut nalunaarutigineqartarneri pillugit maleruagassanik sukumiinerusunik Erhvervsstyrelseni aalajangersaassaaq.

§ 21 b. Aningaasaateqarfimmik piginnittuut isigineqassaaq taanna imaluunniit taakku, tamaasa ataatsimut isigalugit toqqaannartumik imaluunniit toqqaannanngitsumik aningaasaateqarfimmik nakkutiginnittut imaluunniit allatut piginnittuussutsimut assingusumik piginnaatitaaffillit, ilaatillugit

1) aningaasaateqarfiup siulersuisui, aamma

2) inuit immikkut salliutinneqartut, imaluunniit suli aningaasaateqarfimmit ilisimaneqanngitsunik aningaasaateqarfiup agguataaganik inuulluuteqartunik, inuit eqimattat taakku, aningaasaateqarfiup pilersinneqarneranut imaluunniit ingerlanneqarneranut pingaarnertut soqutigisaqartuuppata.

§ 21 c. Inuussutissarsiutigalugu aningaasaateqarfimmik pilersitsinermini, § 12 naapertorlugu kingusinnerpaamik aningaasaateqarfimmik nalunaarsuinnermut peqatigitillugu, aningaasaateqarfiup piginnittui pillugit paasissutissat, ilaatillugit § 21 a, imm. 1 naapertorlugu piginnittui pisinnaatitaaffii pillugit paasissutissat, katersorneqarlutillu nalunaarsorneqassapput.

§ 21 d. Aningaasaateqarfiit § 21 a naapertorlugu piginnittui pillugit paasissutissanik katersillutillu, toqqorsivinniitsillutillu nalunaarsuisussat, noqqaassuteqartoqarnera malillugu, aningaasanik peqquserluutinik malunnaarsaarneq pillugu inatsit kunngip peqqussutaatigut Kalaallit Nunaannut atuutsinneqartoq malillugu, sullittakkanik ilisimasaqalernissamik periaatsinik suliaqartussanik inunnik aamma suliffeqarfinnik, taakkua piginnittui pillugit paasissutissanik pilersuissapput.

Imm. 2. Erhvervsstyrelseni aningaasaateqarfiup piginnittui pillugit paasissutissanut nalunaarsukkanut naleqqiullugit naapertuutinninnerit pillugit aningaasanik peqquserluutinik malunnaarsaarneq pillugu inatsit kunngip peqqussutaatigut Kalaallit Nunaannut atuutsinneqartoq malillugu, nalunaarutiginninnermik tigusaqaruni, Erhvervsstyrelseni § 17, imm. 1-i, aamma § 21 a, imm. 5 naapertorlugit pissutsinik misissuinnermik suliaqassaaq.

Aningaasaateqarfiup pissutsinik aaqqiinissaannut piffissarititamik Erhvervsstyrelseni aalajangersaasinnaavoq.

Imm. 3. Imm. 2 naapertorlugu misissuinnermut peqatigitillugu, Erhvervsstyrelsenip it-kkut atortorissaarutaani nalunaarutiginninneq pillugu ilisimatitsissummik Erhvervsstyrelseni tamanut nalunaaruteqassaaq. Tamatuma tamanut nalunaarutigineqannginnerani, nalunaarutiginninneq pillugu ilisimatitsissummik tamanut nalunaaruteqarnermik siunertaq taamaaliornikkut
maangaannartinneqassanngippat, nalunaarutiginninnermut
naammagittaalliornissamut aningaasaateqarfik periarfissaqartinneqassaaq.«

Piffissaliussamik naatsorsuineq

§ 22. Pisussaq erseqqinnerusumik taaneqartoq ullunik, sapaatit akunnerinik, qaammatinik ukiunilluunniit aalajangersimasumik amerlassusilinnik sioqqullugu iliuksimik iliuuseqartoqarsinnaanera imaluunniit iliuuseqartoqartussaana pillugu peqqussummi matumani imaluunniit peqqussut manna malillugu aalajangersakkani aalajangersaasoqarsimappat, pisussap aqagumut pisussanngorneraniit iliuksip iliuksinissaanut piffissaliussaq naatsorsorneqassaaq.

Imm. 2. Iliuksip iliuksinissaanut piffissaliussaq sapaatip akunnerata naanerani, nalliuttuni, inatsisitaarfimmi, juulliaqqami ukiutoqqamiluunniit naappat, taanna sioqqullugu ulluinnarmi kingullermi iliuuseq kingusinnerpaamik iliuksineqassaaq.

Imm. 3. Pisimasup erseqqinnerusumik taaneqartup pinerata kingorna ullut, sapaatit akunneri, qaammatit ukiulluunniit aalajangersimasumik amerlassusillit qaangiunneranni iliuuseqartoqarsinnaanerani aalajangiisoqarsinnaaneranniluunniit peqqussummi matumani imaluunniit peqqussut manna malillugu aalajangersakkani aalajangersaasoqarsimappat, iliuuseqarnissamut aalajangiinissamulluunniit piffissaliussaq pisimasup pinerata aqaguanit naatsorsorneqassaaq. Piffissaliussap qaangiunnerata aqaguani aatsaat iliuuseqartoqarsinnaavoq aalajangiisoqarluniluunniit.

§ 23. Pisimasup erseqqinnerusumik taaneqartup pinerata kingorna kingusinnerpaamik ullut, sapaatit akunneri, qaammatit ukiulluunniit qaangiutinninneranni iliuuseqartoqarnissaanik

peqqussummi matumani imaluunniit peqqussut manna malillugu aalajangersakkani aalajangersaasoqarsimappat, iliuuseqarnissamut piffissaliussaq pisimasup taassuma pinerata aqaguanit naatsorsorneqassaaq, tak. imm. 2-4.

Imm. 2. Piffissaliussaq, tak. imm. 1, sapaatit akunnerinut taaneqarsimappat, sapaatit akunnerata ulluani pisup piffigisaani piffissaliussaq naassaaq.

Imm. 3. Piffissaliussaq, tak. imm. 1, qaammatinut taaneqarsimappat, iliuuttip iliuuserinissaanut qaammatip ulluani pisup piffigisaani piffissaliussaq naassaaq. Pisimasooq qaammatip ulluani kingullermi pisimappat, imaluunniit qaammatip ulluani piunngitsumi piffissaliussaq naappat, qaammatip qanoq sivisutiginera apeqqutaatinnagu piffissaliussaq qaammatip ulluani kingullermi tamatigut naassassaaq.

Imm. 4. Piffissaliussaq, tak. imm. 1, ukiunut taaneqarsimappat, ukiup ulluani pisup piffigisaani piffissaliussaq naassaaq.

Imm. 5. Piffissaliussaq sapaatit akunnerata naanerani, nalliuttuni, inatsisitaarfimmi, juulliaqqami ukiutoqqamiluunniit naappat, tamatuma kingorna kingusinnerpaamik ulluinnarmi siullermi iliuuseqartoqassaaq.

Kapitali 4

Aningaasaateqarfinnut oqartussat

§ 24. Peqqussut manna malillugu aningaasaateqarfinnut oqartussaassuseq Erhvervsstyrelsimit isumagineqassaaq.

Imm. 2. Peqqussummik matuminnga, peqqussut manna malillugu aalajangersakkanik imaluunniit malittarisassanik unioqqutitsinermi, pissutsit peqqussummut matumunnga, peqqussut malillugu aalajangersakkanut malittarisassanulluunniit naapertuuttunngortinnissaat aningaasaateqarfinnut oqartussat aqutsisunut kukkunersiuisumulluunniit peqqussutigisinnaavaat.

Imm. 3. Aningaasaateqarfinnut oqartussat paasissutissat suliasaminnik isumaginninnissamut pisariaqartitatik piumasaqaatigisinnaavaat.

Misissueqqissaarneq

§ 25. Pissutsit erseqqinnerusumik taaneqartut aningaasaateqarfinnut inuussutissarsiitutit ingerlatamut, taassuma ingerlatsivianut imaluunniit ukiumoortumik nalunaarutaanut tunngasut misissueqqissaarfigineqarnissaat aningaasaateqarfinnut oqartussat aalajangersinnaavaat.

Imm. 2. Aningaasaateqarfinnut oqartussat aningaasaateqarfik sinnerlugu misissueqqissaartussamik ataatsimik arlalinnilluunniit toqqaassapput. Misissueqqissaarnermut aningaasartuutit aningaasaateqarfinnut oqartussanit akuersissutigineqassapput akilerallarneqassallutillu, aningaasaateqarfimmilli akilerneqassallutik.

Imm. 3. Paasissutissat aningaasaateqarfimmik aamma aningaasaateqarfik piginnittuulluni aningaasaateqarfiuppat, piginneqatigiiffissuarmik nalilersuinissamut pingaaruteqartutut isigineqartut pissarsiarinissaat misissueqqissaartut aqutsisunut piumasaqaatigisinnaavaat.

Imm. 4. Misissueqqissaartut aningaasaateqarfinnut oqartussanut allakkatigut nalunaarusiussapput. Misissueqqissaartut aningaasarsiassaat aningaasaateqarfinnut oqartussanit aalajangersarneqassapput.

Kapitali 5

Pilersitsineq

Pilersitsisut

§ 26. Aningaasaateqarfik inuussutissarsiutitut ingerlataq pilersitsisumit ataatsimit arlalinnilluunniit pilersinneqarsinnaavoq.

Imm. 2. Pilersitsisoq akiliisinnaajunnaarallarsimassanngilaq imaluunniit akiliisinnaajunnaarsimassanani.

Imm. 3. Pilersitsisoq inuuppat, inuk nammineersinnaassuseqassaaq aammalu nammineersinnaatitaaneq pillugu inatsit, kunngip peqqussutaatigut Kalaallit Nunaanni atuutsinneqalersoq malillugu pigisat tungaasigut siunnersorteqartitaassanani.

Imm. 4. Pilersitsisoq inatsisitigut pisinnaatitaasuullunilu pisussaataaasuuppat, pineqartoq pisinnaatitaaffeqalersinnaassaaq pisussaaffeqalersinnaassallunilu eqqartuussinernilu illuatungiuutuuinnaassalluni.

Malittarisassat

§ 27. Aningaasaateqarfimmut inuussutissarsiutitut ingerlatat malittarisassat pilersinneqassapput. Taakku imarissavaat

- 1) ateq, taamaattoqarpallu saniatigut aqqit,
- 2) pilersitsisoq,
- 3) siunertaq,
- 4) tunngaviusumik aningaasaatit amerlassusaat, qanorlu iliorluni akilerneqarsimanersut,
- 5) aningaasaateqarfik pilersitsinermut atatillugu naliliutinik allanik aningaasaanngitsunik saniatigut tigusaqassanersoq,
- 6) taamaattoqarpat immikkut pisinnaatitaaffiit ajunngitsorsiassalluunniit, pilersitsisunut allanulluunniit atugassiissutigineqartut,
- 7) siulersuisunut ilaasortat qassiuneri qanorlu toqqarneqartarnersut,
- 8) ukioq naatsorsuiffik, ukioq naatsorsuiffik siulleg ilanngullugu,
- 9) aningaasaateqarfimmik pilersitsinissamik aalajangernerup ulluanit allaanerusemumik inatsisitigut atuuttusanngortitsisoqassappat, ulloq aalajangersimasoq suna aallarnerfigalugu pilersitsineq inatsisitigut atuutsitaallisanersoq, tak. § 29, imm. 3 aamma 4, aamma
- 10) sinneqartoorutinik pissamaatinillu atuineq.

Imm. 2. Uppernarsaatitut allakkiani malittarisassat innersuussutigineqarpata, taassumali pingaarnertut imaa malittarisassani issuarneqarsimanngippat, taanna kakkigunneqassaaq.

Imm. 3. Pissutsit imm. 1, nr. 3-mi aamma 10-mi taaneqartut pillugit najoqqutassanik nalinginnaasunik aalajangersaasoqarpat, taakku Erhvervsstyrelsimut, nalunaarsuinermut oqartussaasumut nassiuunneqassapput.

§ 28. Malittarisassani aalajangersakkat, agguuassinermi ilaqutariinni aalajangersimasuni ilaqutaasut ilaannik imaluunniit ilaqutariinnik aalajangersimasunik salliutitsisut, piffissami pilersitsiffiusumi inuit inuusut qaangerlugit, taakkunungalugu kinguaanngortussat suli inunngunngitsut tikillugit salliutitsineq killeqartinneqarpat, inatsisitigut sunniuteqassanngillat.

Imm. 2. Malittarisassani aalajangersakkanut, aalajangersimasumik atorfeqalernissamut imaluunniit allatigut ilaqutariinni aalajangersimasuni ilaqutaasut ilaannik imaluunniit ilaqutariinnik aalajangersimasunik salliutitsisunut imm. 1-mi aalajangersagaq assigisaanik atorfeqassaaq, sulinermut aningaasarsiaqarnikkut aningaasaateqarfimmit imaluunniit suliffeqarfimmit aningaasaateqarfiup aalajangiisutut sunniuteqarfigisaanit aningaasanik tunineqartarneq ilanngullugu.

Pilersitsinermik nalunaarsuineq

§ 29. Aningaasaateqarfik inuussutissarsiutitut ingerlataq nalunaarsorneqassaaq imaluunniit nalunaarsorneqarnissamut nalunaarutigineqassalluni, tak. § 12, imm. 1. Tunngaviusumik aningaasaatit malittarisassani aalajangersagaasut tamarmiusut akilerneqareertinnagit aamma

siulersuisut kukkunersiuisorlu toqqarneqareertinnagit aningaasaateqarfik nalunaarsorneqassanngilaq.

Imm. 2. Pilersitsinissamut aalajangernerup ulluani imaluunniit ullumi kingusinnerusumi malittarisassani taaneqartumi pilersitsineq inatsisitigut sunniuteqalissaaq, taamaattoq tak. imm. 3 aamma 4.

Imm. 3. Tunngaviusumik aningaasaatit taamaallaat aningaasaviuppata, pilersitsineq malittarisassat ullulerneraniit qaammatinik 12-inik kingusinnerusumi inatsisitigut sunniuteqalersinneqarsinnaanngilaq.

Imm. 4. Aningaasaateqarfik pilersinneqarnerminut atatillugu aningaasaviunngitsunik nalilinnik allanik tigusaqassappat, pilersitsineq piffissamit aningaasaateqarfiup nalunaarsorneqarfianit imaluunniit nalunaarsorneqartussatut nalunaarutigineqarneranit kingusinnerusumi inatsisitigut sunniuteqalersinneqarsinnaanngilaq, tak. imm. 1.

Imm. 5. Aningaasaateqarfik pilersinneqarnerminut atatillugu suliffeqarfimmik pioreersumik tigusippat, imaluunniit suliffeqarfimmi allami piginneqatigiissutinik aalajangiisunik tigusippat, suliffeqarfimmi aningaasaliissutitut atorneqartumi imaluunniit piginneqatigiissutinut tunngasumi ukiumi naatsorsuiffiusumi attuuttumi naatsorsuutit eqqarsaatigalugit pilersitsineq ullormit siullermit sunniuteqalersinneqarsinnaavoq.

§ 30. Aningaasaateqarfik inuussutissarsiutitut ingerlataq nalunaarsugaanngitsoq pisinnaatitaaffeqalersinnaanngilaq, pisussaaffeqalersinnaanngilaq pilersitsinerlu pillugu eqqartuussivimmut suliaasiineq eqqaassanngikkaanni, eqqartuussinerni illuatungiliuttuusinnaanani. Aningaasaateqarfiup oqaaseq pilersinneqalersoq atermi ataanut ilannguttassavaa.

Imm. 2. Inatsisitigut sunniuteqalerfissaq ullormik aningaasaateqarfimmik pilersitsinissamik aalajangernermit kingusinnerusumik ullulerlugu aningaasaateqarfik pilersinneqarpat, tak. § 29, imm. 3 imaluunniit 4, ulloq inatsisitigut sunniuteqalerfissaq tikillugu aningaasaateqarfik sinnerlugu pisinnaatitaaffeqalertoqarsinnaanngilaq pisussaaffeqalertoqarsinnaananilu.

Imm. 3. Pisussaaffimmut, aningaasaateqarfiup pilersinneqarnissaanik aalajangernerup kingorna, nalunaarsorneqarnerulli siorna aningaasaateqarfik sinnerlugu pisussaaffigineqalersunut, inuit pisussaaffimmik isumaqatigiissuteqartut imaluunniit tamatumunnga akisussaaqataasut, tamatumunnga nammaqatigiillutik akisussaasuussapput. Nalunaarsuisoqarneratigut aningaasaateqarfiup pisussaaffiit taakku pisussaaffigilissavai.

Kapitali 6

Aningaasaatit

§ 31. Aningaasaateqarfik inuussutissarsiutitut ingerlataq minnerpaamik 300.000 kr.-inik tunngaviusumik aningaasaateqassaaq

Tunngaviusumik aningaasaatinut aningaasaviit atornagit nalilinnik allanik aningaasaliissuteqarneq

§ 32. Tunngaviusumik aningaasaatit tamakkiisumik ilaannakortumilluunniit aningaasaviit atornagit nalilinnik allanik akilernerqassappata, aningaasaliissutit aningaasaqarnikkut naleqartuussapput, suliaqarnissamut sullissinissamulluunniit pisussaaffiussanatik. Pilersitsisunit pisassarisat aningaasaliissutaasinnaanngillat nangillugilluunniit tiguneqarsinnaanatik, pisassarisat qularnaveeqqusiinikkut qulakkeerneqarsimagaluarpataluunniit.

Imm. 2. Tunngaviusumik aningaasaatit tamakkiisumik ilaannakortumilluunniit aningaasaviit atornagit nalilinnik allanik akilernerqassappata, imaluunniit pilersitsinermut atatillugu nalillit

taamatut ittut aningaasaateqarfiup nangillugit tigussappagit, pissutsit aningaasaliissutit imaluunniit nangillugu tiguserup nalilernissaannut pingaaruteqartut nassuiaatigineqassapput. Nalillit aningaasaliissutigineqartut imaluunniit nangillugit tiguneqartut ataasiakkaat allaaserineqarnerannik nassuiaat imaqaassaaq, inuillu aningaasaliinermut imaluunniit nangillugit tigusermut isumaqatigiissummut ilaasut aqqi najugaqarfiilu taaneqassallutik.

§ 33. Aningaasaateqarfimmut nalilinnik allanik aningaasaliissuteqartoqarpat, imaluunniit aningaasaateqarfiup nalillit allat aningaasaviunngitsut nangillugit tigussappagit, pilersitsinermut atatillugu naliliinermut nalunaarusiaq suliarineqassaaq. Naliliinermut nalunaarusiap imarissavai

- 1) aningaasaliissutit ataasiakkaat tamaasa pillugit allaaserinninneq,
- 2) nalilersuinermit periuseq atorneqartoq pillugu paasissutissat, aamma
- 3) aningaasaqarnikkut nalingata naliliunneqartup minnerpaamik tunngaviumik aningaasaatinik naleqateqarnera pillugu nalunaarut.

Imm. 2. Naliliinermut nalunaarut naliliisartutut ilisimasalimmit arlaannaannulluunniit attuumassuteqanngitsumit imaluunniit taamaattunit arlalinnit suliarineqassaaq. Pilersitsisut kukkunersuiisunik akuerisaasunik naliliisartutut toqqaasinnaapput. Piffimmi aningaasaateqarfiup angerlarsimaffigisassaani pigisanik agguasarnermut eqqartuussivik naliliisartunik pisuni immikkut ittuni toqqaasinnaavoq. Misissuinerit naliliisartut pisariaqartutut isigisatit ingerlatissavaat, suliasamillu isumaginissaannut paasissutissat ikiuunnerlu pisariaqartutut isigisatit pilersitsisunit aqutsisunillu piumasaqaatigisinnaallugit.

Imm. 3. Aalajangiineq sapaatit akunnerinik sisamanik sioqqullugu nalilersuisoqarsimassanngilaq. Piffissaliussaq qaangerneqarpat, nutaamik nalilersuisoqassaaq.

Imm. 4. Pilersinneqarnermut atatillugu aningaasaateqarfiup suliffeqarfik pioreersoq nangillugu tiguppagu, nalilersuinermit nalunaarusiaq aamma aningaasaateqarfik pillugu ammaanermi oqimaatigiissitsinermik kunngip peqqussutaatigut Kalaallit Nunaanni atuutilersinneqartumik imaqaassaaq. Kukkunersuisoqarsimanera pillugu kukkunersuiisup nalunaarutaanik ammaanermi oqimaatigiissitsineq ilanngussiffigineqassaaq.

§ 34. Nalilersuinermit nalunaarusiamik suliarinnittoqarnissaanik § 33, imm. 1 malillugu piumasaqaat, makkunani aningaasaliissuteqarnermi atuutinngilaq:

- 1) Naliliutit pisussaaffiillu, ukioq naatsorsuiffiusoq siulia pillugu ukiumoortumik naatsorsuutini imaluunniit suliffeqarfissuarmut naatsorsuutini ataasiakkaarlugit saqqummiunneqartut, naatsorsuutillu ukiumoortumik naatsorsuutit pillugit inatsit, kunngip peqqussutaatigut Kalaallit Nunaanni atuutsinneqalersoq, imaluunniit nunat tamat akornanni naatsorsuuserinermut pitsaassusiliussat, tak. nunat tamat akornanni naatsorsuuserinermut pitsaassusiliussat, suliffeqarfimmut aningaasaqarnermik suliaqartunut inatsisikkut imaluunniit inatsisit malillugit aalajangersagaasut atorneqarnissaat pillugu Europa-Parlamentip aamma Europa-Rådip peqqussutaat nr. 1606/2002, 19. juli 2002-meersoq malillugit suliarineqarsimappata, imaluunniit suliffeqarfimmut nunami allameersumut naatsorsuutinniippata, naatsorsuutillu Europa-Parlamentip aamma Europa-Rådip peqqussutaat 2013/34/EU kingusinnerusukkut allannguutitalik malillugu suliarineqarsimappata kukkunersuiisumillu oqaaseqarfigineqarsimallutik kiisalu naliliutigineqartoq pisussaaffilluunniit ukiumi naatsorsuiffiusumi siuliani ukiumoortumik naatsorsuutini imaluunniit piginneqatigiiffissuup naatsorsuutaani ullormi pineqartumi nalinga malillugu annertussusilerneqarsimappata.
- 2) Pappialat nalillit imaluunniit aningaasanik niuerfinni sakkussat, malittarisassat atsiorneqarnerat sapaatit akunnerinik sisamanik sioqqullugu tunitsivimmi malittarisassaartumi arlaqartuniluunniit niuerutigineqarsimasut, agguaatigiissillugu kursimut nalilerlugit ilanngunneqartut. Agguaatigiissilluguli kursi taanna pissutsinit immikkorluinnaq ittunit sunnerneqarsimasoq, imaluunniit maanna nalinginik takutitsinngitsutut

isumaqarfigineqarsinnaasoq siulersuisut nalilerpassuk, § 33, imm. 1 malillugu nalilersuinnermut nalunaarusiaq suliarineqassaaq.

Imm. 2. Aningaasaliissutit imm. 1-imut ilaatinneqartut aningaasaateqarfirmut taassumaluunniit akiligassaqarfiinut ajoqutaannginnissaat siulersuisut akisussaaffigaat, siulersuisullu nalunaarummik tulliuuttunik imaqartumik suliaqassapput

- 1) naliliutip taassumalu nalinganik allaaserinninneq,
- 2) nalilersuinnermi periuseq atorneqartoq pillugu paasissutissat,
- 3) naliliutit taaneqartut minnerpaamik tunngaviusumik aningaasaatit naleqateqarnerat pillugu oqaaseqaat, aamma
- 4) pissutsinik nutaanik, aallaqqaammut nalilersuinnermut pingaaruteqartunik, pilertoqarsimannginnera pillugu oqaaseqaat.

Imm. 3. Aningaasaateqarfiup pilersinneqarnerata nalunaarsorneqarnerata imaluunniit nalunaarsorneqartussatut nalunaarutigineqarnerata peqatigisaanik, tak. § 12, imm. 1, siulersuisut imm. 2 malillugu nalunaarut Erhvervsstyrelsimut, nalunaarsuinnermut oqartussaasumut nassiuutissavaat.

Aningaasaatit amerlisinnerat

§ 35. Siulersuisut aalajangernerisigut tunngaviusumik aningaasaatit amerlineqarsinnaapput

- 1) pissamaatinik imaluunniit aningaasaateqarfiup ukiumoortumik naatsorsuutai kingullerpaat kukkuneruigaasut malillugit sinneqartoortunik nuussilluni,
- 2) sinneqartoortunik imaluunniit pissamaatinik pituttugaanngitsunik, piffissap kingullermik ukiumoortumik naatsorsuutunik saqqummiussiffigisap kingorna pilersimasunik nuussilluni, aningaasat agguanneqarsimanngippata, atorneqarsimanngippata imaluunniit pituttugaanngippata, imaluunniit
- 3) kingornussiluni, tunissutisilluni assigisaanilluunniit tapiiffigineqarluni, tunngaviusumik aningaasaatit amerlinissaannut aningaasaateqarfiup tigusimasaasigut.

Imm. 2. Imm. 1 malillugu amerlisitsinerup malitsigisaanik malittarisassanik allannguinerit pisariaqartut siulersuisut suliarissavaat.

Imm. 3. Aningaasaviit atornagit nalilinnik allanik atuilluni aningaasaliissuteqarnikkut aningaasaatinik amerlisitsinnermi, §§ 32-34 assigisaanik atorneqassapput. Pisunili taamatut ittuni suliffeqarfirmut tiguneqartumut nangillugu tigusinnermi oqimaaqatigiissitsinertut, taamaattoqassappat § 33, imm. 4 malillugu oqimaaqatigiissitsineq suliarineqassaaq.

§ 36. Aningaasaatinik amerlisitsineq pissamaatinik sinneqartoortunilluunniit nuussinissamik aalajangernermiit imaluunniit aningaasat amerlisitsissutaasut akilerneqarneranniit kingusinnerpaamik sapaatit akunnerisa tallimat kingorna Erhvervsstyrelsip qarasaasiaqarfiani nalunaarsorneqarsimassaaq imaluunniit nalunaarsorneqarnissamut nalunaarutigineqarsimassalluni. Aningaasaatinik amerlisitsineq nuussisoqareertinnagu akiliisoqareertinnaguluunniit nalunaarsorneqarsinnaanngilaq.

Imm. 2. Nalunaarsorneqarnissaq itigartitsissutigineqarpat, aningaasaatit amerlisinnissaannik aalajangerneq atorunnaassaaq. Aalajangernerup kingorna kingusinnerpaamik qaammatit aqqaneq marluk qaangiunneranni nalunaarsuisoqarsimanngippat nalunaarsorneqarnissamulluunniit nalunaaruteqartoqarsimanani, aalajangerneq aamma atorunnaassaaq.

Kapitali 7

Aqutsisut il.il.

Aqutsisutut sulineq siulersuisullu suliassat pillugit aalajangersakkat nalinginnaasut

§ 37. Aningaasaateqarfik inuussutissarsiutitut ingerlataq siulersuisunit aqunneqassaaq, siulersuisullu siulersuisunut ilaasortat § 64, imm. 1-imi oqaaseqatigiit siulliit malillugit qinerneqartut qaavatigut pingasunik ilaasortaqaassallutik.

Imm. 2. Siulersuisut qullersanik atorfinitsitsisinnaapput, pisortamik ataatsimik pisortanilluunniit arlalinnik inuttaqartunik. Siulersuisut qullersallu aqutsisuupput.

Imm. 3. Siulersuisuni ilaasortat amerlanerussuteqartut aningaasaateqarfimmi pisortatut atorfeqartuussanngillat. Pisortaq siulersuisunut siulittaasuusinnaanngilaq siulittaasulluunniit tullerisinnaanagu.

Imm. 4. Aningaasaateqarfiup suliffeqarfiutaani imaluunniit suliffeqarfimmi aningaasaateqarfiup piginnngisaani, kisiannili suliffeqarfiup ingerlatsinikkut aningaasaqarnikkullu aqunneqarneranut aningaasaateqarfiup suliffeqarfiulluunniit pigisaata annertuumik sunniuteqarfigisaani aqutsisut taamaaqataanilluunniit aalajangiisartut aqutsisunullu ilaasortat taamaaqataanilluunniit aalajangiisartut, aningaasaateqarfiup siulersuisuinut ilaasortanik toqqaqqusaanngillat.

Imm. 5. Siulersuisunut siulittaasoq imaluunniit siulittaasup tullia suliffeqarfimmi pigisami, suliffeqarfimmiluunniit aningaasaateqarfiup piginnngisaani, kisiannili suliffeqarfiup ingerlatsinikkut aningaasaqarnikkullu aqunneqarneranut aningaasaateqarfiup annertuumik sunniuteqarfigisaani pisortaassanngilaq, aningaasaateqarfinnut oqartussat qaqutigorluinnaq pisartumik tamatumunnga akuersinngippata.

§ 38. Siulersuisut taamaallaat aningaasaateqarfiup siunertai soqutigisaalu sulissutigissavaat. Pingaarnertigut periusissatigullu aqutsinerup aningaasaateqarfiullu suliassa illersorneqarsinnaasumik aqqissugaanerisa qulakkeernerisa saniatigut, nakkutigissavaat

- 1) naatsorsuutininut allattuinerup naatsorsuutinillu saqqummiussinerup aningaasaateqarfiup atugaanut naleqqiullugu naammaginarthuunissaat,
- 2) aarlerinartunik aqutsinermut suliffeqarfiullu iluani nakkutilliinermut suleriaatsit pisariaqartinneqartut pilersinneqarsimanissaat,
- 3) aningaasaateqarfiup aningaasaqarnikkut inissisimanera pillugu siulersuisut pisariaqartitamik nalunaarusiorfigineqartarnissaat,
- 4) qullersat suliannik pissusissaattut aamma siulersuisut najoqqutassiaat malillugit sulianninnissaat aamma
- 5) aningaasatigut upalungaarsimanerup qaqugukkulluunniit illersorneqarsinnaanissaa, aningaasaateqarfiup maanna siunissamilu akiligassaasa akilerneqartussanngornerat ilutigalugu akilernissaannut aningaasat tigoriaannaat naammannissaat ilanngullugu, taamaasilluni aningaasaqarnikkut inissisimanerup qaqugukkulluunniit nalilersortarnissaanut siulersuisut pisussaafeqarput, aningaasatigullu upalungaarsimanerup atuuttup illersorneqarsinnaanissaa qulakkeerlugu.

Imm. 2. Aningaasaateqarfinni siulersuisut qullersanik atorfinitsitsiffiginngisaanni, suliassat imm. 1-imi taaneqartut saniatigut, ulluinnarni aqutsineq siulersuisut isumagissavaat.

§ 39. Aqutsisunut ilaasortat nammineersinnaassuseqassapput aammalu nammineersinnaatitaaneq pillugu inatsit, kunngip peqqussutaatigut Kalaallit Nunaanni atuutsinneqalersoq malillugu pigisat tungaasigut siunnersorteqartitaassanatik.

Pilersitsisup siulersuisuni sinniisuutitaqarnera pillugu immikkut aalajangersakkat

§ 40. Pilersitsisoq, taassuma uia/nulia aalajangersimasumilluunniit inooqataa, imaluunniit inuit inunnut pineqartunut siulitut kingulitulluunniit imaluunniit taakkununga ningaatut, imaluunniit

qatanngutitut qanitsigalugit ilaqutaasut, aningaasaateqarfinnut oqartussat akuerseqqaartinnagit siulersuisuni amerlanerussuteqarsinnaanngillat.

Imm. 2. Aningaasaateqarfik inuussutissarsiutitut ingerlataq suliffeqarfimmit pilersinneqarpat, inuk suliffeqarfimmut piginnittuussutsit taasisinnaassutsilluunniit affai sinnerlugit piginnittoq, aningaasaateqarfinnut oqartussat akuersisimatinnagit inuit imm. 1-imi taaneqartut qanitsigisumik attuumassuteqarfigisani peqatigalugit siulersuisuni amerlanerussuteqataasinnaanngilaq. Suliffeqarfimmi pilersinneqartumi aqutsisut aningaasaateqarfinnut oqartussat akuersisimatinnagit, inuit imm. 1-imi taaneqartut aqutsisunut ilaasortanut pineqartunut attuumassuteqartut peqatigalugit siulersuisunit assigisaanik amerlanerussuteqarsinnaanngillat.

Suiaassutsimut tungasut apeqqutaatillugit sinniisuutitaqartarneq

§ 41. Aningaasaateqarfinni inuussutissarsiutitut ingerlatani Den Europæiske Unionip iluani nunami imaluunniit aningaasalersuinnermut suliassaarfik eqqarsaatigalugu Unionip isumaqatigiissuteqarfigisaani, nunami ilaasortani tunitsivinni maleruagassaqartitaasuni niuerutaasinnaasunik akiitsunut sakkusaatilinni imaluunniit pappialanik niuerutaasinnaasunik allanik peqartuni, aningaasaateqarfinnilu inuussutissarsiutitut ingerlatani angisuuni, tak. imm. 2, siulersuisut suliassaraat

- 1) siulersuisuni suaiaassutsit ikinnerussuteqartut amerlinissaannut anguniakkat kisitsisinngortinnerannik suliaqarlutik aamma
- 2) aningaasaateqarfiup aqutsisuini allani assigiinngitsunik qaffasissuseqartuni suaiaassutsit ikinnerussuteqartut amerliniarlugit anguniakkanik suliaqarlutik, taamaattoq tak. imm. 5 aamma 6.

Imm. 2. Aningaasaateqarfissuit inuussutissarsiutitut ingerlatat aningaasaateqarfiupput ukiuni naatsorsuiffiusuni marlunni imminnut malittuni tunngaviit pineqartut ilaannik marlunnik qaangiisut:

- 1) Oqimaaqatigiissitsinerup katinnera 156 mio. kr.-nik annertussuseqartoq,
- 2) kaaviiartitat aningaasartuutit ilanngaatigereerlugit 313 mio. kr.-inik annertussuseqartoq aamma
- 3) piffissaq suliffissarititaq tamaat sulisut agguaqatigiissillugu 250-inik amerlassuseqartut.

Imm. 3. Imm. 2-mi annertussutsit naatsorsorneranni ukiumoortumik naatsorsuutit pillugit inatsimmi, kunngip peqqussutaatigut Kalaallit Nunaanni atuutsinneqalersumi § 7, imm. 3 aamma 4 atorpeqassapput.

Imm. 4. Aningaasaateqarfinnut piginnittunut, piginneqatigiiffissuarmut naatsorsuutininik suliaqartartunut imaluunniit sularinnitsitsisartunut, imm. 2-mi naatsorsuineq piginneqatigiiffissuarmut tunngatillugu sularineqassaaq.

Imm. 5. Aningaasaateqarfinnut piginnittunut, piginneqatigiiffissuarmut naatsorsuutininik suliaqartartunut, piginneqatigiiffissuaq ataatsimut isigalugu imm. 1 malillugu anguniakkat kisitsisinngortinnerannik suliaqarnissaq anguniakkanillu suliaqarnissaq naammappoq.

Imm. 6. Aningaasaateqarfiit inuussutissarsiutitut ingerlatat, ukiumi naatsorsuiffiusumi kingullerpaami 50-it inorlugit sulisoqarsimasut, aningaasaateqarfiup aqutsisuinut assigiinngitsunik qaffasissuseqartunut suaiaassutsit ikinnerussuteqartut amerlisinniarlugit anguniakkanik suliaqartariaqanngillat, tak. imm. 1, nr. 2.

Qullersat suliassaat

§ 42. Aningaasaateqarfinni inuussutissarsiutitut ingerlatani qullersanik atorfinititsisoqarsimatillugu, qullersat ulluinnarni aqutsineq isumagissavaat, tamatumalu ilaattut aningaasaateqarfiup siunertai soqutigisaalu isumagissallugit. Najoqqutassat innersuutillu siulersuisuneersut qullersat malissavaat. Aalajangiinerit aningaasaateqarfiup atugaanut naleqqiullugu nalinginnaanngitsutut pissuseqartut imaluunniit annertuumik pingaaruteqartut

ulluinnarni aqutsinermut ilaangillat. Aatsaat siulersuisunit immikkut ittumik piginnaatitaanikkut qullersat taamatut pisoqartillugu aalajangiisinnapput, siulersuisut aalajangiinissaasa utaqqinissaat aningaasaateqarfimmut annertuumik ajoqutaasussaanaera eqqaassanngikkaanni. Taamatut pisoqartillugu, siulersuisut aalajangiussaq pillugu piaarnerpaamik ilisimatinneqassapput.

Imm. 2. Naatsorsuutitut allattuinerup tamanna pillugu inatsisini maleruagassat malillugit pinissaa, aningaasaatinillu ingerlatsinerup toqqissisimanartumik ingerlanneqarnissaa pisortaanerit qulakkiissavaat.

Imm. 3. Aningaasatigut upalungaarsimanerup qaqugukkulluunniit illersorneqarsinnaanissaa qullersat tamatuma saniatigut qulakkiissavaat, aningaasaateqarfiup maanna siunissamilu akiligassaasa akilernerqartussanngornerat ilutigalugu akilernissaannut aningaasat tigoriaannaat naammannissaat ilanngullugu, taamaasilluni aningaasaqarnikkut inissisimanerup qaqugukkulluunniit nalilersortarnissaanut pisortaanerit pisussaaffeqarput, aningaasatigullu upalungaarsimanerup atuuttup illersorneqarsinnaanissaa qulakkeerlugu.

Imm. 4. Siulersuisut pisuni ataasiakkaani allatut aalajangiinngippata, pisortaq siulersuisut ataatsimiinneranni najuunnissamut oqaaseqarnissamullu pisinnaatitaaffeqarpoq.

Ingerlatsisoq

§ 43. Ingerlatsinermi suliassat aalajangersimasut suliarinissaannut siulersuisut ingerlatsisumut isumaqatigiissuteqarsinnaapput. Ingerlatsisumut isumaqatigiissuteqartoqarsimagaluarpuunniit, aningaasaateqarfiup ulluinnarni ingerlanneranut aqutsisut akisussaapput.

Aqutsisunut ilaasortat tunuarnerat

§ 44. Siulersuisunut ilaasortaq siulersuisunit qaqugukkulluunniit tunuarsinnaavoq.

Imm. 2. Siulersuisunut ilaasortaq akiliisinnajunnaartutut suliarineqaruni, siulersuisunit tunuassaaq.

Imm. 3. Siulersuisunut ilaasortaq, pineqartup siulersuisunut ilaasortaajuarnissamut ataqinassuseerunneranik kinguneqartumik iliuuseqarnermut pisuutitaasoq, siulersuisunit tunuassaaq.

Imm. 4. Siulersuisunut ilaasortaq, sivisuumik napparsimanini imaluunniit allatigut sanngiillinini pissutigalugu siulersuisunut ilaasortatut sulisinnaanngitsutut paasinarsisoq, imaluunniit piukkunnanngitsutut paasineqartoq, siulersuisunit tunuassaaq.

§ 45. Siulersuisunut ilaasortaq imaluunniit pisortaq, § 39-mi piumasaqaatinik eqqortitsinngitsaq aningaasaateqarfinnut oqartussat tunuartissinnaavaat. Aammattaaq siulersuisunut ilaasortaq, pilersitsinermi uppersaasatitut allakkiami piumasaqaatinik imaluunniit malittarisassanik eqqortitsinngitsaq, imaluunniit § 44, imm. 2-4-mi maleruagassat malillugit siulersuisunit tunuartussaasoq, aningaasaateqarfimmut oqartussat tunuartissinnaavaat.

§ 46. Pisuni immikkut ittuni, pisortamik soraarsitsinissaq aningaasaateqarfinnut oqartussat siulersuisunut inassutigisinnavaat, aningaasaateqarfiup ulluinnarni aquunneqarnerata isumaginissaanut piumasaqaatinik pineqartoq erseqqissumik eqqortitsinngippat.

§ 47. Siulersuisunut ilaasortamik tunuartoqartillugu, siulersuisunut ilaasortaq nutaaq malittassat malillugit toqqarneqartassaaq.

Imm. 2. Siulersuisunut ilaasortamik malittarisassat naapertorlugit toqqaasoqanngippat, aningaasaateqarfinnut oqartussat toqqaassapput.

Sinniisussat

§ 48. Siulersuisuni ilaasortat pillugit peqqussummi matumani aalajangersakkat, taakku sinniisussaannut assigisaanik atorneqassapput.

Aqutsisunut ilaasortanik aningaasarsiaqartitsineq

§ 49. Aqutsisunut ilaasortanut aningaasarsiat suliap qanoq ittuunera suliallu annertussusaa malillugit nalinginnaasutut isigineqartut aamma aningaasaateqarfiup inuussutissarsiutitut ingerlatap piginneqatigiiffissuullu piginnittup aningaasaqarnikkut inissisisimanerannut naleqqiullugu illersorneqarsinnaasutut isigisariaqartut qaangissanngilaat.

Imm. 2. Siulersuisunut aningaasarsiarititat annertuallaartutut isigineqartut aningaasaateqarfinnut oqartussanit annikillisinneqarsinnaapput, tak. imm. 1.

Suleriaatsimut malittarisassat

§ 50. Suleriaatsimut malittarisassatigut siulersuisut suliassaasa sularinerannut aalajangersakkat erseqqinnerusut siulersuisut aalajangersassavaat.

Imm. 2. Siulersuisut suleriaatsimut malittarisassanik ilusiliineranni aningaasaateqarfiup suliai pisariaqartitaalu aallaavigineqassapput. Inissitsiterneq, sultanik agguataarineq, qullersanik nakkutigininneq, naatsorsuutitut, protokolinit il.il. allattuineq, allakkatigut elektronikkilu atorlugu ataatsimiinnerit, nipangiussisussaataaneq, sinniisussat, naatsorsuutitut nakkutilliineq, kukkunersuiusut oqaaseqaataannut atsiorneq kiisalu kukkunersuiunermut tunngavissat pisariaqartinneqartut atuunnerisa qulakkeernerat pillugu aalajangersakkanik suleriaatsimut malittarisassat imaqqassanersut, siulersuisut tamatumunnga atatillugu immikkut eqqarsaatigisariaqarpaat.

Suliamut akuusinnaatitaannginneq

§ 51. Aqutsisunut ilaasortaq aningaasaateqarfiup inuussutissarsiutitut ingerlatap pineqartullu nammineq akornanni isumaqatigiissutit pillugit apeqqutit, pineqartoq nammineq akerrallalugu eqqartuussivimmut suliassiissutit imaluunniit aningaasaateqarfiup inuullu allap akornanni isumaqatigiissutitut tunngasut imaluunniit inuk alla akerrallalugu eqqartuussivimmut suliakkiissutit sularineqarneranni peqataaqqusaanngilaq, pineqartoq aningaasaateqarfiup soqutigisaanut akerrallusunik tamatumunnga annertuumik soqutigisaqarpat.

Siulersuisut ataatsimiinnerisa ingerlanneqartarnerat

§ 52. Siulersuisut siulittaasortik namminneq qinissavaat. Taasinerit amerlaqatigiitsillugit qinersineq makitsinikkut aalajangiivigineqassaaq.

Imm. 2. Ataatsimiittoqarnissaa pisariaqartillugu siulersuisut ataatsimiittarnissaat siulittaasup isumagissavaa, siulersuisunullu ilaasortat tamavimmik aggersarneqarnissaat nakkutigissallugu.

Imm. 3. Siulersuisunut siulittaasup, suliassanik siulittaasutut sulinermit ilaanngitsunik aningaasaateqarfimmut sullississanngilaq. Tamatumunngali immikkut ittumik pisariaqartitsisoqartillugu, suliassat siulersuinit qinnuigineqarluni suliareqquneqartut siulersuisunullu sullississutaasut siulersuisunut siulittaasup sularisinnaavai.

§ 53. Siulersuisunut ilaasortanit tamarmiusunit affai sinnerlugit najuuppata, siulersuisut aalajangiisinnatitaapput, amerlanerunissaat malittarisassat malillugit piumasagaataanngippat. Sulialli sularineqarneranut peqataanissamut siulersuisuni ilaasortat tamarluinnarmik periarfissaqarsimatinnagit aalajangiisoqarsinnaanngilaq.

Imm. 2. Siulersuisunut ilaasortaq najuussinnaanngippat, sinniisussamillu qinersisoqarsimappat, najuussinnaannginneq atuukkallartillugu sinniisussaq ilaasortap inissaani peqataasinnaatitaassaaq. Siulersuini allamik aalajangiisoqarsimanngippat malittarisassaniluunniit allanik aalajangersaasoqarsimanani, siulersuisuni ilaasortaq sinniisussamik aggersaanermut taarsiullugu siulersuisunut ilaasortamut allamut piginnaatitsissumik pisuni ataasiakkaani tunniussisinnaavoq, tamanna oqallinnissamut qulequtaq eqqarsaatigalugu toqqissisimanarpat.

Imm. 3. Suliat siulersuisunit suliarineqartut, malittarisassat malillugit immikkut amerlanerussuteqartoqarnissaa piumasaqaatigineqanngippat, nalinginnaasumik amerlanerussuteqarnikkut aalajangerneqartassapput. Taasinerit naligiitsillugit, siulittaasup taasinerata, siulittaasullu peqannginnerani siulittaasup tulliaata taasinerata aalajangiisuunissaat malittarisassani aalajangerneqarsinnaavoq.

Imm. 4. Siulersuisuni isumaqatigiinniarnit pillugit protokolimut allattuisoqassaaq, taannalu siulersuisunut ilaasortanit najuuttunit tamanit atsiorneqassalluni. Aqutsisunut ilaasortap aalajangiinnermut isumaqataannngitsup, isummami protokolimut allatsinnissaa pisinnaatitaaffigaa.

§ 54. Ukiumoortumik naatsorsuutit il.il. kukkunersiuisumit oqaaseqarfigineqartut suliarineqarneranni, kukkunersiuisoq siulersuisut ataatsimiinneranni peqataanissamut pisinnaatitaaffeqarpoq. Aqutsisuni ilaasortap ataasiinnaalluunniit tamanna qinnuteqaatigippagu, kukkunersiuisoq siulersuisut ataatsimiinneranni peqataanissamut pisussaaffeqarpoq.

Imm. 2. Kukkunersiuisoq kukkunersiuiinnermut allattaavimmik ingerlataqarpat, kukkunersiuiinnermut allattaavik siulersuisut ataatsimiinnerini tamani saqqummiunneqartassaaq. Sunaluunniit allattaavimmut ilassutaasoq siulersuisunut ilaasortanik tamanit atsiorneqartassaaq.

§ 55. Aqutsisunut ilaasortap ataatsip, kukkunersiuisup, aningaasaateqarfinnut oqartussat imaluunniit Erhvervsstyrelsen nalunaarsuinnermut oqartussatut siulersuisut aggersarneqarnissaat piumasarisinnaavaa.

Siulersuisut allakkatigut elektronikkilu atorlugu ataatsimiinneri

§ 56. Siulersuisut ataatsimiinneri allakkatigut ingerlanneqarsinnaapput, tamanna siulersuisut suliassaannut naapertuussinnaatillugu. Aqutsisunili ilaasortap ataatsip siulersuisut oqaasiinnartigut oqaloqatigiinnissaat piumasarisinnaavaa. Siulersuisut ataatsimiinnerat pillugu peqqussummi matumani aalajangersakkat, siulersuisut allakkatigut ataatsimiinnerinut assigisaanik atuutissapput.

Imm. 2. Siulersuisuni ataatsimiinnerit elektronikkimik attaveqaatit atorlugit ingerlanneqarsinnaapput, tamanna siulersuisut suliassaannut naapertuussinnaatillugu. Aqutsisunili ilaasortap ataatsip siulersuisut oqaasiinnartigut oqaloqatigiinnissaat piumasarisinnaavaa. Siulersuisut ataatsimiinnerat pillugu aamma elektronik atorlugu attaveqatigiinneq pillugu peqqussummi matumani aalajangersakkat, siulersuisut elektronik atorlugu ataatsimiinnerinut ataatsimiinnermullu atatillugu attaveqatigiinnermut assigisaanik atorneqassapput.

Imm. 3. Siulersuisut elektronik atorlugu ataatsimiinnerinut atugassatut, uppernarsaatitut allakkianik pappialanngortitanik peqqussut manna malillugu nassiussineq saqqummiussinerluunniit atornagu, elektronik atorlugu paarlaasseqatigiittarnerup atorneqarnissaa siulersuisut aalajangersinnaavaat.

Nipangiussisussaataaneq

§ 57. Aqutsisunut ilaasortat, naliliisartut misissueqqissaartartullu kiisalu taakku ikiortaasa sinniisaasalu, suliassaminnik suliarinninnerminni ilisimalikkatik pisussaatitaanatit allanut ingerlateqqissanngilaat.

Paasissutissanik il.il. kukkunersiuisumut nalilersueqqissaartartumulluunniit tunniussineq

§ 58. Paasissutissat aningaasaateqarfimmik, aningaasaateqarfillu piginnittuulluni aningaasaateqarfiuppat, taassuma piginneqatigiiffissuanik naliliinermut pingaaruteqartutut isigineqartut, aqutsisunut ilaasortat kukkunersiuisumut misissueqqissaartumulluunniit kimulluunniit, aningaasaateqarfimmi inuussutissarsiuutitut ingerlatami pissutsit pillugit nalunaaruteqartussamut tunniutissavai, tak. § 6.

Imm. 2. Kukkunersiuisoq misissueqqissaartorluunniit kinaluunniit, aningaasaateqarfimmi pissutsinik nalunaaruteqartussaq, misissuinernik taassuma pisariaqartutut isigisaanik ingerlataqarnissamut aqutsisunut ilaasortat aqqutissaqartissavaat, kukkunersiuisullu imaluunniit misissueqqissaartup paasissutissanik ikiorneqarnissamillu pineqartup suliaminik suliarinninnissamut pisariaqartutut isigisaanik tunineqarnissaa qulakkiissallugu.

Ukiumoortunik naatsorsuutit ataatsimiissutiginerat

§ 59. Ukiumoortumik naatsorsuutit ukiumoortumik ataatsimiissutigineqartassapput, ukiumoortumik nalunaarutip akuersissutigineqarnissaa aamma ukiumoortumik nalunaarut akuersissutigineqartoq malillugu sinneqartoortit atorneqarnissaat imaluunniit amigartoorutit matussuserneqarnissaat siulersuisut tamatumani aalajangiiffigissallugu.

Imm. 2. Ukiumoortumik naatsorsuutit ataatsimiissutiginerannik imm. 1-imi taaneqartumi peqataanissamut kukkunersiuisoq pisussaatitaavoq. Kukkunersiuisulli peqataanissaa pisariaqanngitsoq siulersuisuni ilaasortat tamarluinnarmik isumaqatigiissutigippassuk, kukkunersiuisorlu tamatumunnga isumaqataappat, kukkunersiuisoq peqataanissamut pisussaaffeqanngilaq. Aalajangerneq siulersuisut protokolianni takuneqarsinnaassaaq.

Aningaasaateqarfimmik aqutsilluarnermut kaammattuutit

§ 60. Aningaasaateqarfimmik aqutsilluarnermut kaammattuutit, Aningaasaateqarfimmik Aqutsilluarnermut Ataatsimiititaliamit suliarineqartut qanoq isumaqarfiginerlugit siulersuisut nassuiaassavaat. Aningaasaateqarfiup kaammattuutit ataasiakkaat malinnerai, kaammattuummillu ataatsimik kaammattuutinilluunniit arlalinnik avaqquttarnerai, taamaappallu sorliit avaqqunneqartarnerisut, siulersuisut nassuiaamminni oqaatigissavaat. Siulersuisut kaammattuummik ataatsimik avaqqutaqartarunik, tamatumunnga pissutaasut, taarsiullugulu qanoq aaqqissuussisimanertik siulersuisut nassuiaatigissavaat.

Imm. 2. Kaammattuutitut Aningaasaateqarfimmik Aqutsilluarnermut Ataatsimiititaliap suliaanut siulersuisut qanoq isummersuuteqarnerat pillugu nassuiaateqarnissamut aningaasaateqarfinnut oqartussat siulersuisut peqqusinnaavai, tak. imm. 1.

Immikkut ittumik atuinerit

§ 61. Taamaallaat aningaasaateqarfinnut oqartussat akuersissuteqarnerisigut siulersuisut malittarisassat malinneqarsinnaannginnerannik aarlerinartitsilersinnaasumik imaluunniit aningaasaateqarfiup ingerlaqqissinnaannginnerannik kinguneqarsinnaaneranik aarlerinartitsilersunik immikkut ittumik atuisinnaapput imaluunniit tamatumunnga peqataallutik.

Pilersitsisumit il.il. kingorna pigilikkat

§ 62. Pilersitsisumit il.il. nalilinnik pigisaqalernerup aningaasaateqarfirmut taassumaluunniit akiligassaqaarfiinut ajoqutaannginnissaa aqutsisut akisussaafigaat. Aningaasaateqarfik nalilinnik pilersitsisumit pigisaqalerpat, pigisaqalernermut aningaasaateqarfik akiliuteqarsimappat, akiliutillu tunngaviusumik aningaasaatit minnerpaamik 10 procenterippatigit, pigisaqalerneq aningaasaateqarfinnut oqartussanit akuersissutigineqassaaq. Inunnit inummut oqaaseqatigiinni siullerni pineqartumut katissimanermikkut, aalajangersimasumik inooqateqarnermikkut, imaluunniit pineqartumut siulitut kingulitulluunniit imaluunniit qatanngutitut ilaqutaanermikkut pineqartumut attuumassuteqartunit, allatigulluunniit pineqartumut immikkut ittumik qanittunit pigisarilikkanut assigisaa atuuppoq.

Imm. 2. Pigisaqalernermi pissutsit erseqqinnerusut pillugit nassiuiaammik imm. 1-imiittut akuersissutiginnissannut atugassamik siulersuit suliaqassapput. Tamatuma saniatigit pigisaqalerneq § 34-mut ilaangippat, § 33 malillugu naliliinermut nalunaarusiaq suliarineqassaaq. Pigisariligarli suliffeqaarfiuppat pioreersoq, § 33, imm. 4 malillugu oqimaatigiissitsineq, suliffeqarfirmut pineqartumut pigilerlugu tigusinermi oqimaatigiissitsinertut suliarineqassaaq.

Imm. 3. Aningaasaateqarfiup niuernermut atatillugu nalinginnaasumik atuineranut imm. 1 aamma 2 assigisaanik atorineqassanngillat.

Atuinerit assuarnartut

§ 63. Aqutsisunut ilaasortat imatut atuissanngillat, atuneq aningaasaateqarfiup akiligaanik aqutsisunut ilaasortat allalluunniit assuarnartumik iluaqutissaqalersinnissannut naleqquttuunera erseqqissalluni. Siulersuisunut ilaasortat aalajangiineri assuarnartut, inatsisinut malittarisassanulluunniit akerliusut atorsinnaanngillat.

Imm. 2. Aningaasaateqarfiup aqutsisullu ataatsip arlallilluunniit akornanni isumaqatigiissutit taamaallaat atorsinnaapput, kingusinnerusukkut uppersarneqarsinnaasumik oqaasertalersorneqarunik, isumaqatigiissutit isumannaagassanut suliarineqalereersunut atatillugu nalinginnaasumik atugassaqaartitaalluni isumaqatigiissutaanngippata.

Sulisut sinniisui

§ 64. Siulersuisunut ilaasortanik sulisut qinersisarnerat pillugu maleruagassat piginneqatigiiffiit pillugit inatsimmi, kunngip peqqussutaatigit Kalaallit Nunaanni atuutsinneqalersumi, taannalu malillugu aalajangersakkani aalajangersagaasut, aningaasaateqarfinni inuussutissarsiutitut ingerlatani suliffeqaarfinilu taassuma pigisaanik assigisaanik atorineqassapput. Siulersuisunut ilaasortat sulisunit qinerneqartut, taamaallaat apeqqutit inuussutissarsiutitut suliffeqarfirmut tunngasuunngitsut suliarineqarneranni peqataassapput, tamanna malittarisassani aalajangersagaappat. Siulersuisunut ilaasortat nutaat siulersuisunut ilaasortanit toqqarneqassatillugit, siulersuisunut ilaasortat sulisunit qinigaasut toqqaanermi peqataassanngillat, malittarisassani allamik aalajangiisoqarsimanngippat.

Imm. 2. Aalajangiisoqarnerani siulersuisunut ilaasortat aalajangersimasumik amerlassusillit imaluunniit ilaasortat ilaat aalajangersimasumik amerlassusillit najuunnissaat piumasaqaataappat, siulersuisunut ilaasortat sulisunit qinigaasut imm. 1, oqaaseqatigiit aappaat pingajualluunniit malillugit suliarinninnermut peqataanngitsut naatsorsuinnermut ilaatinneqassanngillat.

Imm. 3. Aningaasaateqarfinni inuussutissarsiutitut ingerlatani piginneqatigiiffimmut piginneqatigiiffissuarmulluunniit sinniisoqarnek pillugu malerugassanik immikut ittunik Erhvervsstyrelsi aalajangersaasinnaavoq.

Piginneqatigiiffissuarmut attuumassutit il.il. pillugit ilisimatitsineq

§ 65. Piginneqatigiiffissuarmut attuumassutit pilerniariartut aningaasaateqarfirmut piginnittumut siulersuisut suliffeqarfik pigisaq ilisimatissavaat. Paasissutissat piginneqatigiiffissuup inissisimanerata piginneqatigiiffissuullu sulinerata inerneranik naliliinissamut pisariaqartinneqartut suliffeqarfiup pigisap aningaasaateqarfirmut piginnittumut tunniutissavai.

§ 66. Suliffeqarfinni pigisani piginnittuussutsit pillugit aqutsisunut ilaasortat iluanaarniuteqassanngillat, iluanaarniarnernulluunniit peqataanatik.

Aningaasaatinik annaasaqarneq

§ 67. Nammineq aningaait tunngaviusumik aningaasaait affai inorlugit annertussuseqalersimanerisa paasineqarneranit kingusinnerpaamik qaammatit pingasut qaangiunneranni siulersuisut ataatsimiinnissaat siulersuisut qulakkiissavaat. Siulersuisut ataatsimiinneranni iliuutsinik tunngaviusumik aningaasaait tamakkiisumik matussusernerannik kinguneqartussanik siulersuisut siunnersuuteqassapput, aningaasaateqarfiulluunniit atorunnaarsinneqarnissaa siunnersuutigalugu.

Imm. 2. Imm. 1-ip eqqortinniarnernut siulersuisut §§ 81-86 isiginiarlugit, tunngaviusumik aningaasaait ikilisinnissaat aalajangersinnaavaat. Tunngaviusumik aningaasaait ikilisinneqarnermik kingorna aningaasanit § 31-mi aalajangersagaasunit ikinneruppata, aningaasaateqarfiup atorunnaarsinneqarnissaa siulersuisut siunnersuutigissavaat.

Imm. 3. Siulersuisut ataatsimiinnerannit, tak. imm. 1 kingusinnerpaamik sapaait akunnerisa tallimat qaangiunneranni siulersuisut ataatsimiinnerannit protokolimut allattukkat allaganngortinnerat, tak. § 53, imm. 4, aningaasaateqarfiup aningaasatigut inissisimanagera pillugu nassuiaatitalik siulersuisut aningaasaateqarfinnut oqartussanut nassitissavaat.

Imm. 4. Siulersuisunut ataatsimiigiaqquisoqanngippat, imaluunniit aningaasaateqarfiup aningaasatigut atugaasa imm. 1 malillugu iluarsinnginnissaat siulersuisut aalajangerpassuk, aningaasaateqarfiup §§ 115-117-imi maleruagassat malillugit pinngitsaaliissummik atorunnaarsinneqarnissaa aningaasaateqarfinnut oqartussat sulissutigissavaat.

Sinniisuutitaasinnaaneq atsiorsinnaatitaanerlu

§ 68. Aqutsisunut ilaasortat aningaasaateqarfik inuussutissarsiutitut ingerlataq avammut sinniisuuffigaat.

Imm. 2. Isumaqatigiissutinit, aningaasaateqarfik sinnerlugu siulersuisunit tamarmiusunit, siulersuisunut ilaasortamit ataatsimit pisortamilluunniit ataatsimit isumaqatigiissutigineqartunit aningaasaateqarfik pisussaaffilerneqartarpoq.

Imm. 3. Atsiorsinnaatitaaneq imm. 2 malillugu siulersuisuni ilaasortanut ataasiakkaanut pisortaanernulluunniit tunniunneqartoq, malittarisassani killilerneqarsinnaavoq, taamaasilluni atsiorsinnaatitaaneq taamaallaat ilaasortat arlallit atsioqatigiinnerattut atorneqarsinnaassalluni imaluunniit ilaasortaq ataaseq ilaasortalluunniit aalajangersimasut tamarmik immikkut ataatsimoorlutilluunniit atsiorsinnaanerattut atorneqarsinnaassalluni. Atsiorsinnaanermut allatigut killiliinerit nalunaarsorneqarsinnaanngillat.

Imm. 4. Piginnaatitsissut taamaallaat siulersuisunit tunniunneqarsinnaavoq.

Kapitali 8

Kukkunersiuneq il.il.

§ 69. Aningaasaateqarfiup inuussutissarsiutitut ingerlatap ukiumoortumik naatsorsuutai kukkunersiuisumit arlalinnilluunniit akuerisaasunit, malittarisassat malillugit imaluunniit siulersuisunit toqqagaasunit kukkunersiorneqassapput. Malittarisassani allamik aalajangiisoqarsimanngippat, ukiumoortumik naatsorsuutit ataatsimiissutigineranni kukkunersiuisoq ukiut ataasiakkaarlugit siulersuisunit toqqarneqartassaaq, tak. § 59. Kukkunersiuisoq malittarisassat malillugit toqqarneqarpat, taamatut toqqaasinnaatitaaneq taamaallaat aningaasaateqarfiup pilersinneqarneraniit ukiut arfineq marluk tikillugit atuussinnaassaaq.

Imm. 2. Aningaasaateqarfimmi kukkunersiuisoqanngippat, aningaasaateqarfinnut oqartussat kukkunersiuisumik toqqaassapput.

§ 69 a. Tamat soqutigisaqarfiisa suliffeqarfiit kukkunersiorneqarnissaannut piumasaqaatit aalajangersimaqqissaartut pillugit Europa-Parlamentip aamma Rådip peqqussutaani (EU) nr. 537/2014, 16. april 2014-meersuni ilanngussaq 17, imm. 1 apeqquatainnagu, § 59 naapertorlugu ukiumoortumik naatsorsuutit pillugit ataatsimiinnermi, kukkunersiuiinnermut inatsimmi § 1 a, nr. 3, naqinneq a-mut ilaatinneqartumi inuussutissarsiutigalugu aningaasaateqarfimmi siulersuisut, kukkunersiuisup taannaatiinnarnissaa toqqarsinnaavaat sivisunerpaamik

- 1) ukiunik 10-nik sivisussuseqartup naanerata kingorna kukkunersiuiinnermut sunniteqartumik tamat soqutigisaqarfiisa suliffeqarfiit kukkunersiorneqarnissaannut piumasaqaatit aalajangersimaqqissaartut pillugit Europa-Parlamentip aamma Rådip peqqussutaani (EU) nr. 537/2014, 16. april 2014-meersuni ilanngussaq 16, imm. 2-5-imut naapertorlugit suliarinnittussarsiuussinnermut periaaseq suliarineqarsimappat, ukiuni 20-ni, imaluunniit
- 2) ukiunik 10-nik sivisussuseqartup naanerata kingorna ukiumoortumik naatsorsuutit pillugit ataatsimiinnermi kukkunersiuiinnerup suliarineqarnissaanut tamatuma saniatigut minnerpaamik kukkunersiuisoq alla ataaseq siulersuisut toqqarpassuk, ukiuni 24-ni.«

§ 70. Aningaasaateqarfinnut oqartussat aningaasaateqarfik sinnerlugu kukkunersiuisumik akuerisaasumik allamik qaavatigut toqqaasinnaapput, tulliani ukiumoortumik naatsorsuutit ataatsimiissutiginnissaasa tungaanut kukkunersiuisoq kukkunersiuisulluunniit toqqagaasut peqatigalugit kukkunersiuiinnermut peqataasussamik, tak. § 59. Peqqussummi matumani kukkunersiuisoq pillugu aalajangersakkat sinneri kukkunersiueqataasumut tassunga assigisaanik atorneqassapput.

Imm. 2. Kukkunersiueqataasut toqqagaasoq Erhvervsstyrelsen qarasaasiaqarfiani nalunaarsorneqassaaq. Kukkunersiueqataasup aningaasarsiasai aningaasaateqarfinnut oqartussat aalajangersassavaat. Kukkunersiueqataasumut aningaasartuutit naalagaaffiup karsianit akilerneqarallassapput, naggataagulli aningaasaateqarfimmit akilerneqassallutik.

§ 71. Paasissutissat aningaasaateqarfimmik inuussutissarsiutitut ingerlatamik, aningaasaateqarfillu aningaasaateqarfiuppat piginnittoq, taassuma piginneqatigiiffissuanik, naliliinnermut pingaaruteqartut isigineqartut kukkunersiuisup aqutsisunut ilaasortanit piumasaqatigisinnavaa, tak. § 6.

§ 72. Kukkunersiuisoq pillugu allannguutit nalunaarsorneqassapput imaluunniit nalunaarsugassanngorlugit nalunaarutigineqassallutik, tak. § 12, imm. 1.

Imm. 2. Kukkunersiuisoq kukkunersiuisumik toqqaasumit aningaasaateqarfinnut oqartussanilluunniit tunuartinneqarsinnaavoq. Kukkunersiuisoq suliap naannginnerani taamaallaat pissutsit tunngavilersugaasut tamanna pisariaqartippassuk tunuartinneqarsinnaavoq.

Imm. 3. Kukkuñersiuiseq soraarpat, imaluunniit kukkuñersiuiseq suliaa naammassitinnagu kukkuñersiuineq allatigut unitsinneqarpat, imaluunniit kukkuñersiuiseq taarsiineq siulersuisut kukkuñersiuiseq akornanni isumaqatigiinngissutit pissutaappata, kukkuñersiuiseq tamanna aningaasaateqarfinnut oqartussanut ingerlaannaq nalunaarutigissavaa. Suliaq unitsinneranut sukumiisumik nassuiaat nalunaarummut ilanngunneqassaaq.

§ 73. Atuakkanik, nalunaarsuiffinnik aamma allattaavinnik pilersitsinissamut aamma ingerlatsinissamut siulersuisut pisussaaffitsik naammassineraat pillugit, aammalu, kukkuñersiuiseq taamaattunik ingerlataqaruni, kukkuñersiuinermut allattaavinnik saqqummiussinissaq atsiornissarluk pillugit maleruagassat naammassineqarnersut kukkuñersiuiseq nakkutigissavai. Kukkuñersiuiseq paasisaqaruni, pineqartut piumasaqaatit naammassineqarsimanngitsut, aningaasaateqarfiit pillugit oqartussaasunut nassiunneqartussamik, kukkuñersiuiseq tamanna pillugu oqaaseqaasiamik immikkoortitamik suliaqassaaq.«

§ 74. Aningaasaateqarfiup inuussutissarsiutitut ingerlasup naatsorsuuserinermut atortuinik aningaasaateqarfinmilu pissutsinik isornartorsiuerpalaartumik misissuinerminut atatillugu, kukkuñersiuineq pillugu piumasaqaatit aningaasaateqarfinnut oqartussat piumasaqaatigisai kukkuñersiuiseq malissavai.

Imm. 2. Peqqussut manna, peqqussut manna malillugu aalajangersakkat malittarisassalluunniit malinneqanngippata, unioqqutitsinerlu pineqartoq pingaaruteqanngitsuunngippat imaluunniit erniinnaq iluarsineqarani, kukkuñersiuiseq ingerlaannaq aningaasaateqarfinnut oqartussanut nalunaaruteqassaaq. Aammattaaq pissutsit kukkuñersiuiseq sulinermini ilisimalersimasai pillugit, aqutsisunullu ilaasortat iliuutsit qaangiinnaanerilluunniit aningaasaateqarfinnik, suliffeqarfinnik tassunga atasunik, akiligassaqarfinnik sulisunilluunniit kalluaasut pillugit taarsiissuteqartitaasinnaanerat pillaatisisinnaaneralluunniit tunngavissaqartumik ilimanaateqarpat, aningaasaateqarfinnut oqartussat aamma ingerlaannaq immikkuullarissumik nalunaarfigineqassapput. Ilanngullugu tulluittunik unioqqutitsinermini tamatigut ilisimatitsisoqartassaaq

1) pinerluttulerinermik inatsimmi kapitali 23 aamma akileraartarnermut, akitsuutitut tapiissutinullu inatsisit, aamma

2) naatsorsuutit saqqummiunneqarnissaannut inatsisit, naatsorsuutitut allattuineq naatsorsuuserinermilu atortunik toqhortaateqarneq.

Imm. 3. Kukkuñersiuiseq kukkuñersiuiseq pillugit inatsit malillugu nalunaarummik tunniussinerminut atatillugu, aningaasaateqarfinni pissutsinik uparuaanissamut tunngavissiiisunik tamatuma saniatigut paasissutissinneqaruni imaluunniit oqaaseqaatissaqarluni, kukkuñersiuiseq ingerlaannaq tamanna pillugu aningaasaateqarfinnut oqartussanut nalunaaruteqassaaq.

§ 75. Aningaasaateqarfinni pissutsit pillugit paasissutissanik tunniussinissamut aningaasaateqarfinnut oqartussat kukkuñersiuiseq peqqusinnaavaat.

Kapitali 9

Agguaassinerit aningaasaatillu allatigut ikilinerat il.il.

§ 76. Aningaasaateqarfiup inuussutissarsiutitut ingerlatap aningaasaataasa ikilinerat taamaallaat imatut pisinnaavoq

1) agguaassineq, tak. §§ 77-79, imaluunniit

2) aningaasaatinik ikilisitsineq, tak. §§ 81-86.

Imm. 2. Aningaasaatit ikiliartornerat aningaasaateqarfiup, aningaasaateqarfinnilu piginnittuni piginneqatigiiffissuup aningaasaqarnikkut inissisimaneranut illersorneqarsinnaanissaanut, kiisalu

anigaasaateqarfimmut taassumalu akiligassaqaarfiinut ajoqutaannginnissaa, tak. § 38, imm. 1, nr. 5 siulersuisut akisussaaffigaat. Tamatuma saniatigut anigaasaatit ikilinerisa kingorna tunngaviusumik anigaasaatinut pissamaatinullu, inatsisit malittarisassallu malillugit pituttugaasunut matussutissaqarnissaq siulersuisut akisussaaffigaat.

Agguaassineq

§ 77. Siunertanut malittarisassani aalajangersagaasunut, tak. § 27, imm. 1, nr. 10, § 78 naapertorlugu agguaassinissaq siulersuisut akisussaaffigaat. Anigaasaateqarfiup inuussutissarsiutitut ingerlatap aalajaallisarnissaanut siulersuisut naammaginatunik illikartitaqarsinnaapput.

§ 78. Agguaassinermi taamaallaat pissamaatit pituttugaanngitsut atorneqarsinnaapput, tassani anigaasat anigaasaateqarfiup ukiumoortumik naatsorsuutaani kingullerni akuerineqartuni sinneqartoorutitut allanneqarsimasut, pissamaatillu inatsisit malittarisassalluunniit malillugit pituttugaanngitsut, amigartoorutinik nuunneqartunik ilanngaasikkat pineqarput.

Imm. 2. Anigaasaateqarfiup ukiumoortumik nalunaarusiaata siulliup saqqummiunneqarnerata kingorna sinneqartoorutitut iluanaarutigineqartut pissamaatillu pituttugaanngitsut, piffissap ukiumoortumik nalunaarusiorfiusup kingorna pilersimasut pituttugaajunnaarsimasulluunniit agguaassinermit aamma atorneqarsinnaapput, anigaasat agguaanneqarsimanngippata, atorneqarsimanatik pituttugaanatilluunniit.

Imm. 3. Anigaasanik imm. 2-mut ilaasunik atuineri, agguaassinissamut siulersuisut aalajangerannut oqimaaqatigiissitsineq ilanngunneqassaaq. Ukiumoortumik nalunaarusiami kingullermi oqimaaqatigiissitsinerup ilanngunneqarnissaa illersorneqarsinnaanersoq, imaluunniit piffissap qiteqqunnerani oqimaaqatigiissitsinermik, agguaassinissamut anigaasanik naammattunik atugassaartoqarneranik takutitsisumik suliarinnittoqassanersoq siulersuisut nalilersussavaat, taamaattoq tak. imm. 4.

Imm. 4. Anigaasaateqarfiup ukiumoortumik nalunaarusiaata kingulliup ullulernerqarneranit qaammatit arfinillit sinnerlugit qaangiunneranni agguaassinissamik aalajangertoqarpat, imm. 3 apeqqutaatinnagu anigaasanik agguaassinissamut naammattunik atugassaartoqarneranik takutitsisumik piffissap qiteqqunnerani oqimaaqatigiissitsinermik suliaqartoqartassaaq.

Imm. 5. Imm. 3 aamma 4 malillugit piffissap qiteqqunnerani oqimaaqatigiissitsinermik suliaqartoqarpat, piffissap qiteqqunnerani oqimaaqatigiissitsineq kukkunersiuisumit misissorneqarsimassaaq. Piffissap qiteqqunnerani oqimaaqatigiissitsineq, maleruagassat anigaasaateqarfiup ukiumoortumik nalunaarusianut suliarinninnermini atortagai malillugit suliarineqassaaq. Piffissap qiteqqunnerani nalunaarusiaq agguaassinissamut aalajangernerup ulluanit qaammatinik arfinilinnik sioqqutsisumik ullulernerqarsimassanngilaq.

Imm. 6. Anigaasaviit atornagit nalillit allat atorlugit agguaassisoqarpat, naliliinermut nalunaarusiaq suliarineqassaaq, tak. § 33. Anigaasaviit pinnagit nalilimmut imaluunniit nalilinnut agguaanneqartunut naligitataq anigaasat agguaanneqartut minnerpaamik naleqatigigaat, naliliisartup nalunaarutaani oqaatigineqassaaq. Siulersuisut § 34, imm. 2-mi maleruagassat malillugit nalunaarummik suliaqarpata nassiussillutillu, § 34, imm. 1-imi eqqaaneqartutut nalilinnik agguaassineri naliliinermut nalunaarusiamik suliaqartitsinissamut pisussaaffeqanngillat. Agguaassinissamut aalajangernermiit kingusinnerpaamik sapaatit akunnerisa tallimat qaangiunneranni, siulersuisut nalunaarut Erhvervsstyrelsen qarasaasiaqarfiatigut tamanut saqqummiutissavaat, tak. § 12, imm. 3. § 33, imm. 4 malillugu oqimaaqatigiissitsineq suliffeqarfimmut tunniunneqartumut tunniussineri oqimaaqatigiissitsinertut suliarineqassaaq.

Imm. 7. Siulersuisut agguaassinissamut aalajangernerat protokolimut allanneqassaaq. Nalilinnik imm. 2-mut ilaatinneqartunik atuineri, piffissap qiteqqunnerani oqimaaqatigiissitsineq imaluunniit ukiumi naatsorsuiffiusumi kingullermi oqimaaqatigiissitsineq, aalajangernermut pineqartumut ilanngussatut siulersuisut protokolianut ilanngunneqassaaq.

§ 79. Siunertamut agguassineq aningaasaateqarfiup aningaasaataanut naleqqiullugu erseqqissumik naleqqutinnigippat, agguassinerup annertusineqarnissaata annikillineqarnissaataluunniit eqqarsaatigineqarnissaa aningaasaateqarfinnut oqartussat siulersuisunut piumasarisinnaavaat.

Imm. 2. Agguassinerup annertussusaa malittarisassanik unioqqutitsinermik kinguneqarsinnaanerani aarlerinartitsilersutut isigineqartariaqarpat, aningaasaateqarfinnut oqartussat siulersuisunut isumaqatigiinniareerunik, agguassinerup annertusineqarnissaa annikillisinneqarnissaaluunniit siunertaralugu siulersuisut pisariaqartitanik atueqqullugit peqqusinnaavai.

Agguassiffigisat allattorsimaffiat

§ 80. Ukiumi naatsorsuiffiusumi aningaasaateqarfimmit agguassinermi pissarsisut allattorsimaffiat kingusinnerpaamik aningaasaateqarfiup ukiumoortumik nalunaarusiaata Erhvervsstyrelsimut nassiunneqarnerata peqatigisaanik siulersuisut aningaasaateqarfinnut oqartussanut nassiutissavaat.

Imm. 2. Allattorsimaffik, tak. imm. 1, uppersaatitut allakkiatut immikkuullarissutut nassiunneqarpat, allattorsimaffik allagaatinik takunnissinnaatitaanermut ilaassanngilaq.

Aningaasaatit ikilisinneqarnissaannik aalajangerneq

§ 81. Siulersuisut aningaasaateqarfinnut oqartussat akuersinerisigut tunngaviusumik aningaasaatit ikilisinneqarnissaat aalajangersinnaavaat, malittarisassat allannortinnerat ilanngullugu. Aningaasaatit ikilisinneqarnissaannik aalajangernermi aningaasat, tunngaviusumik aningaasaatit annikillissutigisassaat taaneqassapput, aningaasallu siunertanut tulliuttunut sorlernut atorneqarnissaat taaneqassalluni:

- 1) Amigartoorutiniq matussusiinermut,
- 2) agguassinermut, imaluunniit
- 3) immikkut ittumik pissamaatinut toqqorsineq.

Imm. 2. Tunngaviusumik aningaasaatit piffissap erseqqinnerusumik aalajangersagaasup ingerlanerani siunertamut agguassinissaq siunertaralugu aningaasanik aalajangersimasunik, imaluunniit piginnittuussutiniq aalajangersimasunik ikilisinneqartassasut malittarisassani aalajangerneqarsinnaavoq. Ikilisitsinerup kinguneraniq malittarisassani allannuutitut pisariaqartitat siulersuisunit aalajangerneqassapput nalunaarsorneqassallutillu imaluunniit nalunaarsorneqartussanngorlugit nalunaarutigineqarlutik, tak. § 12, imm. 1.

Imm. 3. Tunngaviusumik aningaasaatit aningaasaatit minnerpaaffissaattut § 31-mi aalajangersagaasunit ikinnerulersillugit ikilisinneqarsinnaanngillat.

§ 82. Tunngaviusumik aningaasaatit amerlassusaat malittarisassanik unioqqutitsinermik kinguneqarsinnaasutut isigineqartariaqarpat, aningaasaateqarfinnut oqartussat siulersuisunut isumaqatigiinniareerunik aningaasaatit ikilisinneqarnissaannik siulersuisut peqqusinnaavai, tak. §§ 81 aamma 83-86.

Aningaasaviit atornagit nalilinnik allanik agguassinikkut aningaasaatinik ikilisitsineq

§ 83. Aningaasaviit atornagit nalilinnik allanik agguassinikkut aningaasaatinik ikilisitsisoqarpat, piffissami aalajangiiffiusumi naliliinermut nalunaarusiaq pigineqassaaq, tak. § 33. Aningaasaatinik ikilisitsinerup nalingata aningaasaviit atornagit nalilimmut imaluunniit nalilinnut agguanneqartunut naliliunneqartut naleqatigigaat, naliliisartup nalunaarutaani oqaatigineqassaaq. Siulersuisut § 34, imm. 2-mi maleruagassat malillugit nalunaarusiorpata taassuminngalu nassiussillutik, nalilinnik agguassinermi § 34, imm. 1-mi taaneqartutut naliliinermi

nalunaarummik piniarnissaq pisussaaffiunngilaq. Agguaassinissaq pillugu aalajangermerit kingusinnerpaamik sapaatit akunnerisa tallimat qaangiunneranni nalunaarut siulersuisunit Erhvervsstyrelsen qarasaasiaqarfiaq tamanut saqqummiunneqassaaq, tak. § 12, imm. 3. § 33, imm. 4 malillugu oqimaatigiissitsineq suliffeqarfik tunniunneqartoq pillugu tunniussinermit oqimaatigiissitsinertut suliarineqassaaq.

Aningaasaatinik ikilisitsineq pillugu nalunaaruteqarneq

§ 84. Aningaasaatit ikilisinneqarnissaannik aalajangerneq nalunaarsorneqassaaq imaluunniit nalunaarsorneqarnissamut nalunaarutigineqarluni, tak. § 12, imm. 1.

Akiligassaqaqfinnut kaammattuutit

§ 85. Aningaasaatinik ikilisitsineq agguaassinikkut imaluunniit immikkut ittumik pissamaatinut toqqorsinikkut pippat, tak. § 81, imm. 1, nr. 2 aamma 3, aningaasaateqarfiup inuussutissarsiutitut ingerlatap akiligassaqaqfii piffissaliussap sapaatit akunnerinik arfineq marlunnik sivilissuseqartup iluani aningaasaateqarfimmut piumasaqaatit nalunaarutigeqqullugit kaammattorneqassapput. Tunngaviusumik aningaasaatit ikilisinneqarnissaannik siulersuisut aalajangernerisa nalunaarsorneqarnerani tamanullu saqqummiunneqarnerani kaammattuisoqassaaq.

Aningaasaatinik ikilisitsinerup piviusunngortinnera

§ 86. Akiligassaqaqfiit nalunaaruteqarnissaannut piffissaliussaq qaangiuppat, tak. § 85, aningaasaatinik ikilisitsinerup piviusunngortinnissaa illersorneqarsinnaappat, tak. § 38, imm. 1, nr. 5, taamaattoq tak. imm. 4, agguaassinermut imaluunniit immikkut ittumik pissamaatinut toqqorsinermit aningaasaatinik ikilisitsinerup piviusunngortinnissaa siulersuisut aalajangersinnaavaat.

Imm. 2. Agguaassinermut imaluunniit immikkut ittumik pissamaatinut toqqorsinermit aningaasaatinik ikilisitsineq, ikilisitsinerup piviusunngortinnissaa sioqqullugu aningaasaatinik ikilisitsinissamik aalajangernerup atorunnaarsinneqarnissaa nalunaarsorneqarsimanngippat imaluunniit nalunaarsorneqartussatut nalunaarutigineqarsimanngippat, tak. imm. 3, imaluunniit aningaasaatinik ikilisitsineq aatsaat Erhvervsstyrelsimut nalunaaruteqarnikkut piviusunngortinneqartussaannngippat, tak. imm. 4 aamma 5, aningaasaateqarfimmut piumasaqaatit nalunaarutiginissaanut piffissaliussap sapaatit akunnerinik arfineq marlunnik sivilissuseqartup qaangiunnerani Erhvervsstyrelsimut nalunaarsuinermit oqartussaasut qaavatigut ilimasaareqqaarani piviusunngortinneqarsinnaavoq, tak. § 85.

Imm. 3. Agguaassinermut imaluunniit immikkut ittumik pissamaatinut toqqorsinermit aningaasaatinik ikilisitsineq tamanut saqqummiunneqartut naapertorlugit piviusunngortinneqarsinnaannngippat, tak. § 85, imaluunniit aningaasaatinik ikilisitsinerup piviusunngortinnissaa illersorneqarsinnaannngippat, tak. § 38, imm. 1, nr. 5, siulersuisut imm. 2-mi piffissaliussap naannginnerani aningaasaatit ikilisinneqarnissaat atorunnaarsinneqassasoq nalunaarsussavaat imaluunniit nalunaarsugassanngorlugu nalunaarutigalugu.

Imm. 4. Piumasaqaatit akiligassanngortut nalunaarutigineqarsimasut eqqortinneqarsimanngippata, piumasaqaatillu suli akiligassanngunngitsut aaqqiagiinnngissutaasullu pillugit piumasaqartoqarneratigut toqqissimanartunik qularnaveeqqusiisoqanngippat, agguaassinermut imaluunniit immikkut ittumik pissamaatinut toqqorsinermit aningaasaatinik ikilisitsisoqarsinnaanngilaq. Qularnaveeqqutitut neqeroorutigineqartup toqqissimanartutut isigineqarsinnaanera illuatungeriit qinnuteqarnerisigut Erhvervsstyrelsimut nalunaarsuinermit oqartussatut aalajangerneqassaaq.

Imm. 5. Agguaassinermut imaluunniit immikkut ittumik pissamaatinut toqqorsinermit aningaasaatinik ikilisitsineq Erhvervsstyrelsen qarasaasiaqarfiani nalunaarsorneqassaaq imaluunniit

nalunaarsorneqartussatut nalunaarutigineqarluni, kingusinnerpaamik ukiumoortumik nalunaarusiap aningaasaatinik ikilisitsinissamik aalajangernerup ulluata allanneqarfigisaata nassiunneqarnissaanut piffissaliussap naanerani, taamaattoq aningaasaatit ikilisinneqarnissaannik aalajangernermiit ukiup ataatsip qaangiunnerani. Piffissaliussaq qaangerneqarpat, aningaasaatinik ikilisitsinissap piviusunngortinnissaanik aalajangerneq atorsinnaajunnaassaaq.

Imm. 6. Aningaasaatit ikilisinneqarnissaannik aalajangernerup nalunaarsorneqarnerata kingorna, tak. § 84, aningaasaateqarfik pillugu allannguinerit ilaasa aningaasaatinik ikilisitsinerup atorunnaarsinneqarneranik kinguneqartussaananerata, imaluunniit Erhvervsstyrelsimut nalunaarsuinnermut oqartussatut nalunaaruteqareernikkut aningaasaatinik ikilisitsinerup piviusunngortinneqarnissaa pillugu maleruagassanik Erhvervsstyrelsi aalajangersaasinnaavoq.

Pilersitsisumut, aqutsisunut ilaasortanut il.il. agguaassinerit

§ 87. Pilersitsisunut, aqutsisunut ilaasortanut, kukkunersiuksunut inunnulluunniit aningaasaateqarfimmi aqutsisutut atorfimmi inissisimasunut, aningaasarsiat, suliap qanoq ittuunera suliallu annertussusaa malillugu nalinginnaasutut isigineqartunit qaangiisussaannigitsut saniatigut tunniussisoqassanngilaq. Inuit taaneqartut arlaannut katissimanermigut imaluunniit aalajangersimasumik inooqateqarnermigut attuumassuteqartunut, inuillu taaneqartut meeraannut ukiukinnerusunut assigisaa atuuppoq.

Imm. 2. Inunnut imm. 1-imi taaneqartunut attartortitsineq qularnaveeqqusiinerluunniit inerteqqutaavoq.

Imm. 3. Aningaasaateqarfik inuussutissarsiutitut ingerlataq nalinginnaasumik niuernermtut atatillugu atuinnermini inunnut imm. 1-imi taaneqartunut imm. 2 apeqqutaatinnagu attartortitsinnaavoq imaluunniit qularnaveeqqusiinnaalluni.

Utertitsineq

§ 88. Peqqussummi matumani aalajangersakkanut akerliuqsumik agguaassisoqarsimappat imaluunniit aningaasaatit allatigut ilanngarneqarsimappata, tiguisut aningaasat tiguisimasatik utertissavaat, ukiumoortumik ernianik, kingusinaarluni akiliinnermi il.il. erniat pillugit inatsimmi, kunngip peqqussutaatigut Kalaallit Nunaanni atuutsinneqalersumi § 5, imm. 1 aamma 2 malillugit aalajangersagaasunik, 2 procentinik ilassutilinnik ernialerlugit. Tamannali taamaallaat atuutissaaq aningaasanik tunniussineq inatsisinik unioqqutitsinerusoq tiguisup paasisimappagu imaluunniit paasisimasariaqaraluarlugu, taamaattoq tak, § 49, imm. 2.

Imm. 2. Aningaasaateqarfik inuussutissarsiutitut ingerlataq § 87, imm. 2-mut akerliuqsumik attartortitsisimappat imaluunniit attartukkanut qularnaveeqqusiisimalluni, aningaasat aningaasaateqarfimmut utertinneqassapput ukiumoortumik ernianik, kingusinaarluni akiliinnermi il.il. erniat pillugit inatsimmi, kunngip peqqussutaatigut Kalaallit Nunaanni atuutsinneqalersumi § 5, imm. 1 aamma 2 malillugit aalajangersagaasunik, 2 procentinik ilassutilinnik ernialerlugit, erniat qaffasinnerusut isumaqatigiissutigineqarsimanngippata.

Imm. 3. Imm. 1 imaluunniit 2 malillugit utertitsisoqarsinnaanngippat, imaluunniit tiguisoq utertitsinissamut pisussaaffeqanngippat, tak. imm. 1, oqaaseqatigiit aappaat, siulersuisuni ilaasortat akiliinissamik aalajangernermtut peqataasimasut imaluunniit akiliinnerup piviusunngortinneranut peqataasimasut, imaluunniit naatsorsuutitut eqqunngitsumik allanneqarnerata akuersissutiginneranut peqataasimasut, taarsiissuteqarnissamut maleruagassat nalinginnaasut malillugit annaasanut aningaasaateqarfiup annaasinnaasaanut akisussaasuupput.

Imm. 4. Aalajangersakkamut matumunnga akerliuqsumik qularnaveeqqusiisoqarsimanera isumaqatigiisummi illuatungiusup ilisimasimanngippagu, § 87, imm. 2-mut akerliuqsumik qularnaveeqqusiineq aningaasaateqarfimmut pituttuisuussaaq.

Kapitali 10

Malittarisassanik allanngortitsineq

§ 89. Siulersuisut inassuteqarnerisigut malittarisassani aalajangersakkamik allanngortitsinissaq, imaluunniit aningaasaateqarfiup inuussutissarsiutitut ingerlatap atorunnaarsinneqarnissaa, taamaattoq tak. imm. 2, aningaasaateqarfinnut oqartussat akuerisinnaavaat. Aningaasaateqarfiup aningaasaateqarfinnut arlalinnulluunniit, aningaasaateqarfiit peqatigiiffiillu ilaat pillugit inatsimmut, kunngip peqqussutaatigut Kalaallit Nunaanni atuutsinneqalersumut ilaatinneqartunut kattunneqarnissaa ilanngullugu akuerineqarsinnaavoq.

Imm. 2. Siunertat agguassisarnerilluunniit pillugit malittarisassanik allanngortitsinermi aamma § 107 naapertorlugu aningaasaateqarfiup atorunnaarsinneqarnerani, imm. 1 naapertorlugu akuersisinnaassagaanni, aningaasaateqarfinnut oqartussat Civilsstyrelsimit akuerineqaqqaassapput.

Imm. 3. Imm. 1 aamma 2-mi aalajangersakkat atorneqassapput, malittarisassanik allanngortitsinissamut siulersuisut allalluunniit malittarisassatigut pisinnaatitaaffeqartitaanerat apeqqutaatinnagu.

§ 90. Aalajangersagaq piviusunngortinneqarsinnaanngippat imaluunniit siunertamut erseqqissumik naapertuutinngitsoq paasinarsippat, aningaasaateqarfinnut oqartussat siulersuisunut isumaqatigiinniareerunik Civilsstyrelsillu akuersineratigut, malittarisassani aalajangersakkap allanngortinneqarnissaa aalajangersinnaavaat.

Imm. 2. Malittarisassani aalajangersagaq inatsisinut imaluunniit aningaasaateqarfiup pilersinneranut uppersaasatitut allakkiamut akerliuppat, pineqartup allanngortinneqarnissaa Civilstyrelsip aalajangersinnaavaa.

Kapitali 11

Kattunneq

Aningaasaateqarfiit inuussutissarsiutitut ingerlatat kattunnerat

§ 91. Aningaasaateqarfik inuussutissarsiutitut ingerlataq kapitalimi matumani aalajangersakkat malillugit atorunnaarsitsinertaqanngitsumik atuuttuujunnaarsinneqarsinnaavoq, aningaasaateqarfiup naliliutaasa pisussaaffiisalu ataatsimut isigalugit aningaasaateqarfinnut inuussutissarsiutitut ingerlatamut allamut nuunnerisigut. Aningaasaateqarfiit marluk amerlanerusulluunniit aningaasaateqarfinnut ataasiinnanngortinneranni assigisaa atuuppoq. Akiligassaqarfiit akuersitinnagit nuussinerit piviusunngortinneqassapput.

Imm. 2. Aningaasaateqarfik inuussutissarsiutitut ingerlataq atuuttuujunnaarsinnaavoq imm. 1 malillugu kattunnikkut, aningaasaateqarfiup ingerlaqqittup siunertai aningaasaateqarfiup atuukkunnaartup siunertaanut qanittuuppata, aningaasaateqarfiullu atuukkunnaartup siunertai

- 1) kattunnikkut pitsaanoqisumik isumagineqalissappata imaluunniit
- 2) eqqortinneqarsinnaajunnaarpata imaluunniit taamaallaat ajornakusoortumik eqqortinneqarsinnaappata imaluunniit naleqqukkunnaarsimappata.

Imm. 3. Aningaasaateqarfik inuussutissarsiutitut ingerlataq imm. 1 malillugu kattunnermut aningaasaateqarfittut ingerlaqqissinnaavoq, imaappat

- 1) kattunneq aningaasaateqarfiup malittarisassaanut akerliunngippat aamma
- 2) kattunneq aningaasaateqarfiup soqutigisaatut isumaqarfigineqartariaqarpata.

Imm. 4. Aningaasaateqarfinni kattuttuni ataasiakkaani siulersuisut kattunnissaq pillugu aalajangiissapput, aningaasaateqarfinnut oqartussat § 96 malillugu tamatumunnga akuersissuteqarnissaat apeqqutaatillugu.

Imm. 5. Piffissaq aningaasaateqarfiup atuukkunnaartup pisinnaatitaaffiisa pisussaaffiisalu naatsorsuuserinikkut aningaasaateqarfinnut ingerlaqqittumut nuunneqarsimasutut

isigineqarsinnaanerat sioqqullugu aningaasaateqarfiup atuukkunnaartup ukiumoortumik naatsorsuiffini naareersimappagu, piffissamullu naatsorsuiffiusumut tamatumunnga ukiumoortumik nalunaarusiaq siulersuisunit suli akuerineqarsimanngippat, piffissamut naatsorsuiffiusumut tamatumunnga ukiumoortumik nalunaarut siulersuisut kingusinnerpaamik kattunnissamik aalajangernerup peqatigisaanik akuerissavaat.

Imm. 6. Aningaasaateqarfiup inuussutissarsiutitut ingerlatap atorunnaarsinneqalersup, atorunnaarsitsinermi iluanaarutininik agguaassineq suli aallartinneqarsimanngippat, aningaasaateqarfittut atuukkunnaartutut imaluunniit aningaasaateqarfittut ingerlaqqittut kattunnermut peqataaniarluni atorunnaarsitsinermik unitsitsinissaa, atorunnaarsitsisartup aningaasaateqarfinnut oqartussanit akuerineqarluni aalajangersinnaavaa akueraluguluunniit. Aningaasaateqarfik aningaasaateqarfiussappat ingerlaqqittoq, kattunnissamut akuerineqassaguni, tak. § 96, peqqussummi matumani aalajangersakkanik malittarisassallu piumasaqaataanik eqqortitsinissaa piumasaqaataavoq, aningaasaatinut, aqutsinermut kukkunersiuinermullu piumasaqaatit ilanngullugit. Tamatuma kingorna akuerisaaqqinnermut § 119-imi maleruagassat atorneqassanngillat.

Imm. 7. Aningaasaateqarfiup inuussutissarsiutitut ingerlatap pinngitsaaliissummik atorunnaarsinneqalersup aningaasaateqarfittut atuukkunnaartutut imaluunniit aningaasaateqarfittut ingerlaqqittutut kattunnermut peqataasinnaanera pigisanik agguaassisarnermut eqqartuussivip imaluunniit atorunnaarsitsisartup pigisanik agguaassisarnermut eqqartuussivimmit toqqagaasup aningaasaateqarfinnut oqartussanit akuerineqarluni aalajangersinnaavaa akueraluguluunniit. Aningaasaateqarfik aningaasaateqarfiussappat ingerlaqqittoq, kattunnermut akuerisaanissaq pisariaqarpoq, tak. § 96, aningaasaateqarfiup peqqussummi matumani aalajangersakkanik malittarisassanilu piumasaqaatinik eqqortitsinissaa piumasaqaataavoq, aningaasaatinut, aqutsinermut kukkunersiuinermullu piumasaqaatit ilanngullugit. Tamatuma kingorna akuerisaaqqinnermut § 119-imi maleruagassat atorneqassanngillat.

Imm. 8. Aningaasaateqarfiup inuussutissarsiutitut ingerlatap akiliisinnaajunnaartup aningaasaateqarfittut atuukkunnaartutut kattunnermut peqataanissaa akiliisinnaajunnaartunik suliarinnittartup aalajangersinnaavaa akueraluguluunniit.

Kattunnermut nassuiaat ataatsimoorussaq

§ 92. Aningaasaateqarfinni kattuttuni siulersuisut kattunnermut nassuiaat ataatsimoorussaq pilersissavaat ataatsimoorlutillu atsiorlugu, taassuma tulluittut pillugit paasisutissat aalajangersakkallu imarissavai

- 1) aningaasaateqarfiit aqqi saniatigullu aqqi, aningaasaateqarfiup atuukkunnaartup aqqa saniatigulluunniit aqqa aningaasaateqarfiup ingerlaqqittup saniatigut aqqanut ilaassanersoq ilanngullugu,
- 2) aningaasaateqarfiit angerlarsimaffii,
- 3) aningaasaateqarfiup atorunnaartup pisinnaatitaaffiisa pisussaaffiisalu naatsorsuuserinikkut nuunneqarsimasutut qaqugukkut isigineqarnissaannut piffissaq, tak. imm. 2,
- 4) iluaqutissat suulluunniit, aqutsisunut ilaasortanut, pilersitsisunut allanulluunniit tunniunneqartut, aamma
- 5) § 96 malillugu akuerineqarnissaq siunertaralugu kattunnerup naleqquttuuneranik aningaasaateqarfinnut peqataasunut ataasiakkaanut tamanut tunngavilersuutit, aningaasaateqarfiit ataasiakkaat siunertaasa eqqortinnissaannut kattunnerup kingunissai pillugit nassuiaat kiisalu aningaasaateqarfiit kattuttut siunertaasa qanoq imminnut qanitsiginerat pillugu nassuiaat ilanngullugit.

Imm. 2. Kattunnermut nassuiaat ataatsimoorussaq kingusinnerpaamik ukiumi naatsorsuiffiusumi, piffissap kattunnerup naatsorsuuserinikkut sunniteqalerfiata, tak. imm. 1, nr. 3, ilaaffigisaata naanerani atsiorneqarsimassaaq. Piffissaliussaq qaangerneqarpat, Erhvervsstyrelsen

nalunaarsuinnermut oqartussatut kattunneq nalunaarsorsinnaassanngilaa.

Piffissap qiteqqunnerani oqimaaqatigiissitsineq

§ 93. Kattunnermut nassuiaat ataatsimoorussaq ukiup naatsorsuiffiusup, aningaasaateqarfiup ukiumoortumik nalunaarusiaani kingullermi pineqartup naanerani qaammatit arfinillit sinnerlugit qaangiutereerneranni atsiorneqarsimappat, aningaasaateqarfimmut pineqartumut piffissap qiteqqunnerani oqimaaqatigiissitsineq suliarineqassaaq. Piumasaqaammik tamatuminnnga atuinninnissamut aningaasaateqarfinnut oqartussat immikkut akuersissuteqarsinnaapput.

Imm. 2. Piffissap qiteqqunnerani oqimaaqatigiissitsineq, ukiumoortumik naatsorsuutit pillugit inatsit, kunngip peqqussutaatigut Kalaallit Nunaanni atuutsinneqalersoq malillugu suliarineqartussaasoq, kattunnermut nassuiaatip ataatsimoorussap atsiorneqarnerata qaammatit pingasut siornagut naammassisutut ullulerneqarsimassanngilaq. Piffissap qiteqqunnerani oqimaaqatigiissitsineq kukkunersiorneqarsimassaaq.

Akiligassa qarfiit inissisimanerat pillugu naliliisartut nalunaarutaat

§ 94. Aningaasaateqarfinni ataasiakkaani akiligassa qarfiit aningaasaateqarfiup maanna inissisimaneranut naleqqiullugu kattunnerup kingorna naammattumik qularnaveeqqusigaasimasutut isumaqarfigineqarsinnaanerata pillugu naliliisartuq immikkut ilisimasalik arlaannaannulluunniit attuumassuteqanngitsoq arlallilluunniit aningaasaateqarfiit kattuttut ataasiakkaat tamaasa pillugit allakkatigut nalunaarusiussaaq.

Imm. 2. Naliliisartut § 33, imm. 2, oqaaseqatigiit pingajuat malillugu toqqarneqassapput. Naliliisartuq ataaseq arlallilluunniit ataatsimoorullugit atorneqarnissaat aningaasaateqarfiit kattuttut siulersuisuisa kissaatigippassuk, taakku siulersuisoqatigiiaat qinnuteqarnerisigut piffimmi aningaasaateqarfiup ingerlaqqittup angerlarsimaffigisaani pigisanik agguaassisarnermut eqqartuussiviup toqqassavai. Naliliisartut aningaasaateqarfinnut kattuttunut tamanut attuumassutaat pillugit § 33, imm. 2, oqaaseqatigiit sisamaat assigisaanik atorneqassaaq.

Imm. 3. Aningaasaateqarfinni peqataasuni tamani akiligassa qarfiit aningaasaateqarfiit maanna inissisimanerinut naleqqiullugu kattunnerup kingorna naammaginartumik qularnaveeqqusigaasimanerannik isumaqartariaqarnermut imm. 1 malillugu nalunaarutip pitsaasumik oqaaseqaatitaqarnissaa, aningaasaateqarfinnut oqartussat kattunnermut akuersinissaannut piumasaqaataavoq.

Kattunnermik nalunaaruteqarneq uppersaaititullu allakkianik nassiussineq

§ 95. § 92 malillugu kattunnermut nassuiaatip ataatsimoorussap atsiorneqarneraniit kingusinnerpaamik sapaatit akunnerisa arfineq marluk qaangiunneranni Erhvervsstyrelsip nalunaarsuinnermut oqartussatut aningaasaateqarfinnit peqataasunit tamanit tulliuttut tigoreersimassavai

- 1) kattunnerup nalunaarutiginera,
- 2) kattunnermut siulersuisut aalajangernerannut uppersaaititut allakkia, tak. § 91, imm. 4,
- 3) kattunnermut nassuiaat ataatsimoorussaq, tak. § 92,
- 4) taamaattoqarpat piffissap qiteqqunnerani oqimaaqatigiissitsineq, tak. § 93,
- 5) akiligassa qarfiit inissisimanerat pillugu naliliisartut nalunaarutaat, tak. § 94, aamma
- 6) malittarisassat ullulikkat, kattunnermut atatillugu aningaasaateqarfimmik nutaamik pilersitsisoqarpat imaluunniit aningaasaateqarfimmi ingerlaqqittumi malittarisassanik allannguisoqarpat.

Imm. 2. Kattunneq § 96 malillugu aningaasaateqarfinnut oqartussanit akuersissutigineqassappat, aningaasaateqarfik pillugu paasissutissanut nalunaarsugaasunut allannguinerup kinguneranik allannguutaasinnaasut imm. 1 malillugu nalunaarummut ilaassapput.

Kattunnermut aningaasaateqarfinnut oqartussat akuersinerat

§ 96. Kattunnissamut siulersuisut aalajangernerannut aningaasaateqarfinnut oqartussat akuersinissaat piumasaqaataavoq. § 91, imm. 2-8-mi, § 92, imm. 1-mi, § 93-mi, § 94, imm. 3-mi, aamma § 95, imm. 1-mi piumasaqaatit eqqortinneqarsimappata, aningaasaateqarfinnut oqartussat kattunnissamut akuersissuteqassapput.

Kattunnerup inatsisitigut sunniutaasa atuutilernerat

§ 97. Aningaasaateqarfik atuukkunnaartussaq atorunnaarsimasutut isigineqassaaq aamma pisinnaatitaaffiisa pisussaaffiisalu ataatsimoorlutik aningaasaateqarfimmut ingerlaqqittumut nuunneqarsimasutut isigineqassallutik, imaappat

- 1) kattunnissamut akuersissuteqartoqarpat, tak. § 96, aamma
- 2) kattunneq Erhvervsstyrelsen qarasaariaqarfiani nalunaarsorneqareerpat.

§ 98. Aningaasaateqarfik inuussutissarsiutitut ingerlataq, kattunnermut atatillugu pilersinneqartoq aningaasaateqarfiup nalunaarsorneqarnera sioqqullugu isumaqatigiissuteqarpat, aningaasaateqarfiullu nalunaarsugaannginnera atsioqataasup ilisimappagu, nalunaarsugaanissaq itigartissutigineqarpat, allanillu isumaqatigiissuteqartoqarsimanngippat, atsioqataasup isumaqatigiissut atorunnaarsissinnaavaa. Aningaasaateqarfiup nalunaarsugaannginnera atsioqataasup ilisimasimanngippagu, aningaasaateqarfik nalunaarsorneqarsimanngikkallartillugu atsioqataasup isumaqatigiissut atorunnaarsissinnaavaa.

Aningaasaateqarfiup inuussutissarsiutitut ingerlatap piginneqatigiiffimmik (-nnik) tamakkiisumik pigisaminik kattunnera

§ 99. Aningaasaateqarfiup piginnittup piginneqatigiiffik, aktianik piginneqatigiiffiusoq andelselskabiusorluunniit tamakkiisumik pigisani tigusinnaavaa, taamaasilluni piginneqatigiiffiup pigisap naliliutai pisussaaffiilu ataatsimoortillugit aningaasaateqarfimmit tiguneqassallutik, taamaasiornikkut piginneqatigiiffik pigisap atorunnaarsitsinertaqanngitsumik atuukkunnaarsinneqassaaq. Nuussinerit akiligassaqarfiit akuersiteqqaarnagit piviusunngortinneqassapput.

Imm. 2. Kattunnermut aningaasaateqarfimmut siulersuisut aalajangiisuussapput, aningaasaateqarfinnut oqartussat § 104 malillugu akuersissuteqarnissaat apeqqaatillugu.

Imm. 3. Aningaasaateqarfimmut imm. 1 malillugu kattunnermut peqataasumut § 91, imm. 6 aamma 7 assigisaanik atorneqassapput.

Imm. 4. Piginneqatigiiffiup pigisap atuukkunnaartussap kattunnissaanut piginneqatigiiffiup qitiusumik aqutsisuutitai aalajangiissapput.

Imm. 5. Piginneqatigiiffik pigisap atuukkunnaartussaq atorunnaarsinneqalerpat, taamaallaat aningaasaatinik piginnittut aningaasaateqarfimmut agguassineq sulii aallartinneqarsimanngippat, atorunnaarsitsinissallu atorunnaarsinnissaa ataatsimeersuarnerup kingusinnerpaamik peqatigisaanik akuersissutigippagu imm. 1 malillugu kattunnissaq aalajangerneqarsinnaavoq. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi suliamik suliarinneqqilerneq pillugu § 231 atorneqassanngilaq.

Imm. 6. Piginneqatigiiffik pigisap atuukkunnaalersoq pinngitsaaliissummik atuukkunnaalerpat, pigisanik agguassisarnermut eqqartuussiviup imaluunniit atorunnaarsitsisartup pigisanik agguassisarnermut eqqartuussivimmit toqqagaasup kattunnissamut akuersinissaa imm. 1 malillugu kattunnissap aalajangerneqarsinnaatut piumasaqaataavoq.

Imm. 7. Piginneqatigiiffik pigisaq akiliisinnaajunnaartoq imm. 1 malillugu kattunnermut peqataasinnaavoq, akiliisinnaajunnaarnermut nakkutilliisoq tamatumunnga isumaqataappat.

Imm. 8. Piginneqatigiiffiup pigisap piffissaq taassuma pisinnaatitaaffiisa pisussaaffiisalu naatsorsuuserinikkut aningaasaateqarfimmut ingerlaqqittumut nuunneqarsimasutut isigineqarsinnaalernerat sioqqullugu ukioq naatsorsuiffiusoq naasimappagu, ukiumullu naatsorsuiffiusumut tamatumunnga ukiumoortumik nalunaarusiaq ataatsimeersuarnermit suli akuersissutigineqarsimanngippat, piffissamut naatsorsuiffiusumut tamatumunnga ukiumoortumik nalunaarusiaq ataatsimeersuarnerup kingusinnerpaamik kattunnissamut aalajangernerup peqatigisaanik akuersissutigissavaa.

Kattunnissamut nassuiaat ataatsimoorussaq

§ 100. Aningaasaateqarfimmi siulersuisut piginneqatigiiffinnilu pigisani qitiusumik aqutsisuutitat kattunnermut nassuiaat ataatsimoorlutik pilersissavaat atsiorlugulu, tulluuttut pillugit paasisutissat aalajangersakkallu nassuiaatip imarissavai

- 1) aningaasaateqarfiup suliffeqarfiillu pigisat aqqi taamaattoqarpallu saniatigut aqqi, suliffeqarfiillu pigisat atuukkunnaartut aqqi saniatigulluunniit aqqi aningaasaateqarfiup ingerlaqqittup saniatigut aqqanut ilaassanersoq ilanngullugu,
- 2) aningaasaateqarfiup suliffeqarfiillu pigisat angerlarsimaffii,
- 3) suliffeqarfiup pigisap atorunnaartup pisinnaatitaaffiisa pisussaaffiisalu naatsorsuuserinikkut aningaasaateqarfimmut nuunneqarsimasutut qaqugukkut isigineqarnissaannut piffissaq, tak. imm. 2,
- 4) iluaqutissat suulluunniit, aningaasaateqarfiup imaluunniit piginneqatigiiffiup pigisap aqutsisuinut tunniunneqartut, aamma
- 5) § 104 malillugu akuerineqarnissaq siunertaralugu kattunnermut tunngavilersuutit.

Imm. 2. Kattunnermut nassuiaat ataatsimoorussaq kingusinnerpaamik ukiumi naatsorsuiffiusumi, piffissap kattunnerup naatsorsuuserinikkut sunnuteqalerfiata, tak. imm. 1, nr. 3, ilaaffigisaata naanerani aningaasaateqarfik piginneqatigiiffiillu pigisat ataasiakkaat tamaasa sinnerlugit atsiorneqarsimassaaq. Piffissaliussaq qaangerneqarpat, Erhvervsstyrelsen nalunaarsuinnermut oqartussatut kattunneq nalunaarsorsinnaassanngilaa.

Piffissap qiteqqunnerani oqimaaqatigiissitsineq

§ 101. § 93 aningaasaateqarfimmut assigisaanik atorneqassaaq.

Imm. 2. Piginneqatigiiffiit pillugit inatsimmi, kunngip peqqussutaatigut Kalaallit Nunaanni atuutsinneqalersumi § 239 piginneqatigiiffinnut pigisanut assigisaanik atorneqassaaq.

Akiligassa qarfiit inissisimanerat pillugu naliliisartut nalunaarutaat

§ 102. Aningaasaateqarfiup piginneqatigiiffinnillu pigisani ataasiakkaani akiligassa qarfiit aningaasaateqarfiup piginneqatigiiffiillu pigisat ataasiakkaat maanna inissisimanerannut naleqqiullugu kattunnerup kingorna naammattumik qularnaveeqqusigaasimasutut isumaqarfineqarsinnaanerit pillugu naliliisartoq immikkut ilisimasalik arlaannaannulluunniit attuumassuteqanngitsoq arlallilluunniit aningaasaateqarfik piginneqatigiiffiillu pigisat kattunnermut peqataasut ataasiakkaat tamaasa pillugit allakkatigut nalunaarusiussaaq.

Imm. 2. Naliliisartut § 33, imm. 2, malillugu toqqarneqassapput. Naliliisartoq ataaseq arlallilluunniit ataatsimoorullugit atorneqarnissaat aningaasaateqarfimmut siulersuisut piginneqatigiiffinnilu pigisani peqataasuni qitiusumik aqutsisuutitat kissaatigippassuk, taakku aqutsisuutitat qinnuteqarnerisigut piffimmi aningaasaateqarfiup ingerlaqqittup

angerlarsimaffigisaani pigisanik agguaaassisarnermut eqqartuussiviup toqqassavai. Naliliisartut inatsisitigut akisussaasunut pisussaasunullu kattuttunut tamanut attuumassutaat pillugit assigisaanik § 33 atorneqassaaq.

Imm. 3. Inatsisitigut akisussaasuni pisussaasunilu peqataasuni tamani akiligassa qarfiit aningaasaate qarfiit piginneqatigiiffillu pigisat ataasiakkaat maanna inissisimanerannut naleqqiullugu kattunnerup kingorna naammaginartumik qularnaveeqqusigaasimanerannik isumaqartariaqarnermut imm. 1 malillugu nalunaarutip pitsaasumik oqaaseqaatitaqarnissaa, aningaasaate qarfinnut oqartussat kattunnermut akuersinissaannut piumasaqaataavoq.

Kattunnermik nalunaarutiginninneq uppersaaitullu allakkianik nassiussineq

§ 103. § 100 malillugu kattunnermut nassuiaatip ataatsimoorussap atsiorneqarneraniit kingusinnerpaamik sapaatit akunnerisa arfineq marluk qaangiunneranni Erhvervsstyrelsip nalunaarsuineranut oqartussat aningaasaate qarfimmit piginneqatigiiffinnillu pigisanit peqataasunit tamanit tulluuttut tigoreersimassavai

- 1) kattunnerup nalunaarutiginera,
- 2) kattunnissamik aalajangernermut uppersaaitut allakkia, tak. § 99, imm. 2 aamma imm. 4,
- 3) kattunnermut nassuiaat ataatsimoorussaq, tak. § 100,
- 4) piffissap qiteqqunnerani oqimaaqatigiissitsineq ilanngunneqarsinnaavoq, tak. § 101,
- 5) akiligassa qarfiit inissisimanerat pillugu naliliisartut nalunaarutaat, tak. § 102, aamma
- 6) malittarisassat ullulikkat, kattunnermut atatillugu aningaasaate qarfimmi malittarisassanik allannguisoqarpat.

Imm. 2. Kattunneq § 104 malillugu aningaasaate qarfinnut oqartussanit akuersissutigineqassappat, aningaasaate qarfik pillugu paasissutissanut nalunaarsugaasunut allannguinerup kinguneranik allannguutaasinnaasut imm. 1 malillugu nalunaarummut ilaassapput.

Kattunnermut aningaasaate qarfinnut oqartussat akuersinerat

§ 104. Kattunnissamut siulersuisut aalajangernerannut aningaasaate qarfinnut oqartussat akuersinissat piumasaqaataavoq. Kattunnissamut aningaasaate qarfinnut oqartussat akuersissapput, imaappat

- 1) kattunneq aningaasaate qarfiup malittarisassaanut akerliunngippat,
- 2) kattunneq aningaasaate qarfiup soqutisaatut isumaqarfigineqartariaqarpat, aamma
- 3) § 99, imm. 2-mi 3-milu, § 100, imm. 1-imi, § 101-imi, § 102, imm. 3-mi, aamma § 103, imm. 1-imi piumasaqaatit eqqortinneqarpat.

Kattunnerup inatsisitigut sunniutaasa atuutilernerat

§ 105. Piginneqatigiiffiit pigisat peqataasut tamarmik atuukkunnaartutut isigineqarsinnaalerpata, taakkualu pisinnaatitaaffii pisussaaffiilu ataatsimoortillugit aningaasaate qarfimmut nuunneqarsimasutut isigineqarsinnaappata, kattunneq piviusunngortinneqarsimasutut isigineqassaaq imaappat

- 1) kattunnissamut akuersissuteqartoqareerpat, tak. § 104, aamma
- 2) kattunneq Erhvervsstyrelsip qarasaasiaqarfiani nalunaarsorneqareerpat.

§ 106. (Kalaallit Nunaanni atuutsinneqalissanngilaq)

Atuukkunnaarsitsineq

Atorunnaarsinneqarnissamut aalajangerneq

§ 107. Atorunnaarsitsinikkut nammineq piumassutsimik atuukkunnaarsitsineq pillugu siulersuisut aalajangiissapput, § 89, imm. 2 isiginiarlugu.

Imm. 2. Aningaasaateqarfik inuussutissarsiutitut ingerlataq malittarisassat malillugit piffissamut erseqqinnerusumik taaneqartumut pilersinneqarsimappat, siulersuisut kisimik imm. 1 malillugu aalajangiisnaapput.

Atorunnaarsitsisartumik toqqaaneq

§ 108. Atorunnaarsitsineq piviusunngortinniarlugu aningaasaateqarfinnut oqartussat siulersuisut inassuteqareernerisigut atorunnaarsitsisartumik ataatsimik arlalinnilluunniit toqqaassapput, taakkulu aqutsisunut taartaassapput. Peqqussummi tamatumani aqutsisut pillugit aalajangersakkat atorunnaarsitsisartumut atorneqassapput.

Imm. 2. Atorunnaarsitsisartoq toqqaagaagallartarpoq. Aningaasaateqarfinnut oqartussat atorunnaarsitsisartumik qaqugukkulluunniit tunuartitsisinnaapput atorunnaarsitsisartumillu allamik toqqaallutik.

Imm. 3. Siulersuisut aningaasaateqarfiup atorunnaarsinneqarnissaanik aalajangernermik peqatigisaanik, tak. § 107, imm. 1, atorunnaarsitsisartumik toqqaanissamut aalajangiissapput. Atorunnaarsitsinissamik aalajangernerup nalunaarsorneqarnerata nalunaarsorneqarnissamulluunniit nalunaarutigineqarnerata peqatigisaanik, tak. § 109, imm. 1, atorunnaarsitsisartoq Erhvervsstyrelsimut inassutigineqassaaq.

Imm. 4. Atorunnaarsitsisartoq Erhvervsstyrelsip qarasaasiaqarfiani nalunaarsorneqareerpat, tak. § 109, imm. 1, atorunnaarsitsinermik suliaq aallartinneqarsinnaavoq. Piffissami nammineq piumassutsimik atuukkunnaarsitsinissamik aalajangernermiit, tak. § 107, imm. 1, atorunnaarsitsisartumik toqqaanissap tungaanut, maannamut aqutsisuusut taamaallaat pisariaqartunik, aningaasaateqarfimmut, ilanngullugit aningaasaateqarfiup siunertaanut, soqutigisaanut akiligassaqarfiinullu, ajoqutaanngitsumik piviusunngortinneqarsinnaasunik atuisinnaapput.

Imm. 5. Atorunnaarsitsisartoq aqutsisunut ilaasortaasimassanngilaq, aningaasaateqarfiullu siunertaanut ingerlataanullu atatillugu arlaannaannulluunniit attuumassuteqartuussanani.

Atorunnaarsitsinerup nalunaarutiginera

§ 109. § 89, imm. 2-mi piumasaqaatit eqqortinneqareerpata, atorunnaarsitsinissamik aalajangerneq nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Aalajangerneq pillugu nalunaarut kingusinnerpaamik nalunaarsuinerup imaluunniit nalunaarsorneqartussatut Erhvervsstyrelsimut, nalunaarsuinnermut oqartussatut, nalunaarutigineqarnerata peqatigisaanik, aningaasaateqarfiup akiligassaqarfiinut ilisimaneqartunut tamanut nassiunneqassaaq.

Imm. 2. Aningaasaateqarfiup atorunnaarsinneqalersup atini attatiinnassavaa, »atorunnaarsinneqalersok«-mik ilallugu.

Imm. 3. Aningaasaateqarfimmi atorunnaarsitsinissamik aalajangiisoqarpat, aningaasaateqarfik pillugu pissutsit nalunaarsugaasut allanngortinneqarnissaat pillugu aalajangiisoqarsinnaanngilaq, tulluuttut kisiisa pinnagit

- 1) atorunnaarsitsisartumik allanngwineq,
- 2) kukkunersiuisumik allanngwineq,

- 3) aningaasaatinik amerlisitsinerit,
- 4) maannamut angerlarsimaffittut najukkami aningaasaateqarfimmut attaveqarsinnaanngikkaanni, imaluunniit pissutsit aalajangersimasut qaqutigooraluartumik taamaattariaqartippassuk, angerlarsimaffittut najukkap atorunnaarsitsisartup najugaanut allanngortitsineq,
- 5) aallarteqqinneq, tak. § 119, aamma
- 6) kattunneq, tak. § 91, imm. 6, aamma § 99, imm. 3, taamaattoqarpallu § 106 malillugu aalajangersakkat saqqummiunneqartut.

Imm. 4. Imm. 3, nr. 1 malillugu atorunnaarsitsisartumik allannguneq taamaallaat aningaasaateqarfinnut oqartussanit aalajangerneqarsinnaavoq, tak. § 108, imm. 1. Pissutsit imm. 3, nr. 2-6-imi taaneqartut allanngortinneqarnissaannik aalajangernissamut atorunnaarsitsisartup aalajangiinissaa allannguutinulluunniit isumaqataanissaa piumasaqaataavoq. Aammattaaq pissutsinik imm. 3, nr. 2 aamma 4-6 malillugit aalajangiinerit, aamma aningaasaateqarfinnut oqartussanit akuersissutigineqassapput.

Akiligassaqaarfinnut kaammattuutit

§ 110. Siulersuisut atorunnaarsitsinissamik aalajangernerata, tak. § 107, imm. 1, Erhvervsstyrelsen qarasaasiaqarfianut nalunaarsorneqarnerani tassuunalu tamanut saqqummiunneqarnerani, aningaasaateqarfiup akiligassaqaarfii qinnuigineqassapput ullormit tamanut saqqummiussiffiusumit qaammatit pingasut qaangiutsinnagit piumasaqaatitik atorunnaarsitsisartumut nalunaarutigeqqullugit.

Imm. 2. Atorunnaarsitsisartup siusinnerpaamik imm. 1-imi piffissaliussaq naareerpat pigisat naammassillugit suliarisinnaalissavai.

Imm. 3. Pisassarisat nalunaarutigineqartut atorunnaarsitsisartup akuerisinnaanngippagit, akiligassaqaarfik tamanna pillugu nalunaarfigineqassaaq. Aalajangiinerup akertilernerneqarnissaa kissaatigineqarpat, nalunaarutip nassiunneqarneraniit kingusinnerpaamik sapaatit akunnerisa arfineq marluk qaangiunneranni suliap aningaasaateqarfiup angerlarsimaffigisaani pigisanik agguassissarnermut eqqartuussivimmut suliassiissutigineqartussaanera pillugu akiligassaqaarfik ilisimatinneqassaaq.

Imm. 4. Pigisat naammassisussanngorlugit suliarineqareernerisa kingorna pisassarisat nalunaarutigineqartut, aningaasanit malittarisassat malillugit suli agguanneqanngitsunit matussuserneqassapput.

Atorunnaarsitsinerup nalaani ukiumoortumik nalunaarusiamik saqqummiussineq

§ 111. Peqqussummi matumani aamma ukiumoortumik naatsorsuutit pillugit inatsimmi, kunngip peqqusutaatigut Kalaallit Nunaanni aalajangersakkami, naatsorsuutitik saqqummiussineq kukkunersiunerlu pillugit kiisalu ukiumoortumik nalunaarusiap Erhvervsstyrelsimut nassiunneqarnissaa pillugu aalajangersakkat aningaasaateqarfinnut inuussutissarsiutitut ingerlatanut atorunnaarsinneqalersunut assigisaanik atorneqassapput.

Atorunnaarsitsisartup suliassai, atorunnaarsitsinermut pissutaasut pingaarnerit pillugit nassuiaat ilanngullugu

§ 112. Aningaasaateqarfiup inuussutissarsiutitut ingerlatap soqutigisai atorunnaarsitsisartup atorunnaarsitsinerup nalaani qulakkiissavai, aningaasaateqarfiullu naliliutaasa aningaasannngortinnissaat aningaasaateqarfiullu pisussaaffiisa akilerneqarnissaat isumagissallugu.

Taamaallaat aningaasaateqarfiup naammaginartumik atorunnaarsinnissaanut pisariaqartitaq tikillugu aningaasaateqarfiup sulinera atorunnaarsitsisartumit isumagineqarsinnaavoq.

Imm. 2. Atorunnaarsitsisartup aningaasaateqarfiup inuussutissarsiutitut ingerlatap suliai imaluunniit inatsisit aningaasaateqarfinnut tunngasut ima ilisimasaqarfigitigissavai, suliaassap qanoq ittuuneranut annertussusaanullu naleqqiullugu suliarinnissinnaanermut ilisimasat naammassallutik.

Imm. 3. Atorunnaarsitsisartoq toqqarneqarnermi kingorna piaarnerpaamik atorunnaarsitsinermut pissutaasut pingaarnepaat pillugit aningaasaateqarfinnut oqartussanut nassuiaammik saqqummiussissaaq, ilanngullugulu oqaatigalugu pillaatisiaqartitsinissaq siunertaralugu misissuinerup aallartinnissaa tunngavissaqarnersoq.

*Atorunnaarsitsisartup aningaasarsiaasa akuersissutiginerat aningaasaateqarfiullu
aningaasaataanik agguaassineq*

§ 113. Atorunnaarsitsisartup aningaasarsiasaminik aalajangersaanera, suliaq annertussusaa qanoq ittuuneralu, akisussaaffik suliamut attuumassuteqartoq pissutsillu atuuttut atugaralugit angusat anguneqartut eqqarsaatigalugit pisussaq, aningaasaateqarfinnut oqartussanit akuersissutigineqassaaq.

§ 114. § 110, imm. 1-imi piffissaliussaq naareerpat, akiligassaqaqarfinnullu ilisimaneqartunut tamanut akiligassat akilerneqareerpata, atorunnaarsitsinermilu iluanaarutininik agguaassinissaq aningaasaateqarfinnut oqartussanit akuersissutigineqarpat, atorunnaarsitsinermi iluanaarutininik agguaassisoqarsinnaavoq.

Imm. 2. Pigisanik suliarinninneq naammassippat, aningaasaateqarfiup inaarutaasumik atorunnaarsinneqarnera atorunnaarsitsisartumit aalajangerneqarsinnaavoq. § 110, imm. 3 malillugu isumaqatigiinngissutaasinnaasut aalajangiivigineqareertinnagit, pigisanik suliarinninneq naammassineqassanngilaq.

Imm. 3. Atorunnaarsitsinerup naammassineraniit kingusinnerpaamik sapaatit akunnerisa tallimat qaangiunneranni tamanna Erhvervsstyrelsen qarasaasiaqarfiani nalunaarsorneqassaaq nalunaarsorneqartussatulluunniit nalunaarutigineqassalluni. Atorunnaarsitsinermi naatsorsuutit atorunnaarsitsinermi iluanaarutit agguaanneqarnerannut uppersaataitallit nalunaarsuineranut nalunaaruteqarnermulluunniit ilanngussatut ilaatinneqassapput. Atorunnaarsitsinermi naatsorsuutit kukkunersiuisumit akuerisaasumit kukkunersiorneqarsimassapput. Tamatuma kingorna aningaasaateqarfik Erhvervsstyrelsen nalunaarsuiffianit peerneqassaaq.

Pinngitsaaliissummik atuukkunnaarsitsineq

§ 115. Erhvervsstyrelsen nalunaarsuineranut oqartussat § 89, imm. 1 mianeralugu, aningaasaateqarfiup inuussutissarsiutitut ingerlatap angerlarsimaffiani pigisanik agguaassisarnermut eqqartuussivik qinnuigisinnaavaa aningaasaateqarfik atuukkunnaarseqqullugu, imaappat

- 1) ukiumoortumik naatsorsuutit pillugit inatsit, kunngip peqqussutaatigut Kalaallit Nunaanni atuutsinneqalersoq malillugu ukiumoortumik nalunaarutit akuerisat pissusissamittut pissusillit piffissaagallartillugu aningaasaateqarfiup nassiussimanngippagit,
- 2) peqqussummi matumani malittarisassaniluunniit piumasarineqartut aningaasaateqarfik siulersuisoqanngippat kukkunersiuisoqaraniluunniit, aamma § 47, imm. 2, imaluunniit § 69, imm. 2 naapertorlugit siulersuisunik kukkunersiuisumilluunniit nutaamik aningaasaateqarfinnut oqartussat toqqaanissaat naapertuutinnigitsutut nalilerneqarpat,
- 3) § 21 a naapertorlugu aningaasaateqarfiup piginnittuiit pillugit paasissutissat nalunaarsorsimanngippagit imaluunniit aningaasaateqarfik amigartumik nalunaarsuinermik suliaqarsimappat,
- 4) § 21 a naapertorlugu aningaasaateqarfiup piginnittuiit pillugit paasissutissat

nalunaarsorsimanngippagit imaluunniit aningaasaateqarfik amigartumik nalunaarsuineramik suliaqarsimappat,

5) peqqussummi matumani malittarisassaniluunniit piumasarineqartutut piffimmi angerlarsimaffigisassami aningaasaateqarfik angerlarsimaffeqanngippat, imaluunniit

6) pisuni § 67, imm. 4-mut, imaluunniit § 118, imm. 2-mut ilaasuni atuukkunnaarsitsinissaa akuersissutigineqanngippat.

Imm. 2. Erhvervsstyrelsi nalunaarsuinermit oqartussatut piffissaliussamik

aalajangersaasinnaavoq, taannalu qaangertinnagu imm. 1 malillugu amigaatit aningaasaateqarfiup iluarsiniarsinnaavai. Kingusinnerpaamik piffissaliussap aalajangersagaasup naanerani amigaataasut iluarsineqarsimanngippata, Erhvervsstyrelsip nalunaarsuinermit oqartussatut aningaasaateqarfik atuukkunnaarseqqullugu pigisanik agguaassisarnermit eqqartuussivik qinnuigisinnaavaa, tak. imm. 1.

Imm. 3. Atuukkunnaarsitsineq inatsisitigut malittarisassatigulluunniit inassutigineqartoq, siulersuisunit akuerineqanngippat, Erhvervsstyrelsip aningaasaateqarfiup angerlarsimaffigisaani pigisanik agguaassisarnermit eqqartuussivik qinnuigisinnaavaa aningaasaateqarfik atuukkunnaarseqqullugu.

§ 116. Aningaasaateqarfiup inuussutissarsiutitut ingerlatap pinngitsaaliisummik atorunnaarsinneqarnissaanik suliap pigisanik agguaassisarnermit eqqartuussivimmut nassiuuneqarnissaanik aalajangerneq Erhvervsstyrelsip qarasaasiaqarfiatigut Erhvervsstyrelsip tamanut saqqummiutissavaa.

Imm. 2. Aningaasaateqarfiup atini attatiinnassavaa »pinngitsaaliisummik atuukkunnaarsinneqalersoq«-mik ilallugu.

Imm. 3. Pigisanik agguaassisarnermit eqqartuussiviup atorunnaarsitsisartoq arlallilluunniit toqqarsinnaavai. Pigisanik agguaassisarnermit eqqartuussiviup aamma kukkunersuiisoq toqqarsinnaavaa. Pinngitsaaliisummik atuukkunnaarsitsinermit kapitalimi matumani atorunnaarsitsinermit maleruagassat atuupput, imaalillugilli inuk pigisanik agguaassisarnermit eqqartuussiviup toqqagaa, imaluunniit inuk eqqartuussiviup tamatumunnga piginnaatitaa pissutsinik aningaasaateqarfirmut tunngasunik aalajangiisassalluni. Atuukkunnaarsitsinermit aningaasartuutit pisariaqarpat naalagaaffiup karsianit akilerneqassapput.

Imm. 4. Pigisanik suliarinninneq naammassippat, pigisanik agguaassisarnermit eqqartuussiviup tamanna Erhvervsstyrelsimut nalunaarsuinermit oqartussaasumut nalunaarutigissavaa, taassumalu aningaasaateqarfiup atuukkunnaarnera Erhvervsstyrelsip qarasaasiaqarfianut nalunaarsussallugu.

§ 117. Aningaasaateqarfik inuussutissarsiutitut ingerlataq pinngitsaaliisummik atuukkunnaarsinneqassaaq aalajangertoqarpat, aningaasaateqarfik pillugu pissutsit nalunaarsugaasut allanngortinneqarnissaat pillugu aalajangiisoqarsinnaanngilaq, tulluittut kisiisa pinnagit

1) atorunnaarsitsisartumik pigisanik agguaasarnermut eqqartuussivimmit toqqagaasumik ivertitsineq allannguinerluunniit, tak. § 116, imm. 3, oqaaseqatigiit siulliit,

2) kukkunersuiisumik pigisanik agguaassisarnermit eqqartuussivimmit toqqagaasumik ivertitsineq allannguinerluunniit, tak. § 116, imm. 3, oqaaseqatigiit aappaat,

3) aallarteqqinneq, tak. § 120, imaluunniit

4) kattunneq, tak. § 91, imm. 7, aamma § 99, imm. 3, taamaattoqarpallu aalajangersakkat § 106 malillugu aalajangersagaasut.

Imm. 2. Atorunnaarsitsisartumik imm. 1, nr. 1 malillugu allannguineq taamaallaat pigisanik agguaassisarnermit eqqartuussivimmit aalajangerneqarsinnaavoq. Pissutsit imm. 1, nr. 2-4-imi taaneqartut allanngortinneqarnissaat aalajangissagaanni, atorunnaarsitsisartup pigisanik agguaassisarnermit eqqartuussivimmit toqqagaasup aalajangiisuunissaa isumaqataanissaaluunniit piumasaqaataavoq. Pissutsit imm. 1, nr. 3-miittut 4-miittullu allanngortinneqarnissaannik

aalajangiineq, aamma aningaasaateqarfinnut oqartussanit akuersissutigineqassaaq.

Imm. 3. Piffissami aningaasaateqarfiup pigisanik agguaassisarnermut eqqartuussivimmut ingerlateqqinneraniit atorunnaarsitsisartumik toqqaanissap aningaasaateqarfiulluunniit atuukkunnaarsinneqarnissaata tungaanut, maannamut aqutsisuusut taamaallaat pisariaqartunik, aningaasaateqarfimmu, ilanngullugit aningaasaateqarfiup siunertaanut, soqutigisaanut akiligassaqarfiinullu, ajoqutaanngitsumik piviusunngortinneqarsinnaasunik atuisinnaapput.

Imm. 4. Maannamut aqutsisuusut atorunnaarsitsinissap aallartinneqata tungaanut aningaasaateqarfiup sulinera pillugu paasissutissanik pigisanik agguaassisarnermut eqqartuussivimmik taamaattoqarpallu atorunnaarsitsisartumik, pigisanik agguaassisarnermut eqqartuussivimmit toqqagaasumik pisariaqartitamik ikiuunnissaq pisussaaffigaat. Aningaasaateqarfiup maannamut kukkunersiuksuanut assigisaa atuuppoq, pigisanik agguaassisarnermut eqqartuussivik aningaasaateqarfiup maannamut aqutsisuunit paasissutissanik pissarsisinnaanngippat. Paasissutissat pigisanik agguaassisarnermut eqqartuussiviup taamaattoqarpallu atorunnaarsitsisartutut toqqagaasup, piumasaqaatinik pioreersunik takkuttussanillu nalilersuinnissaannut pisariaqarsinnaasut aqutsisut kukkunersiuksuullu tunniutissavaat. Piginneqatigiiffissuarni aningaasaateqarfik suliffeqarfittut piginnittutut pinngitsaaliissummik atuukkunnaartussatut ingerlateqqinneqarpat, suliffeqarfinni pigisani aqutsisut assigisaanik pigisanik agguaassisarnermut eqqartuussivimmik taamaattoqarpallu atorunnaarsitsisartumik pigisanik agguaassisarnermut eqqartuussivimmit toqqagaasumik ikiuunnissamut pisussaaffeqarput.

Imm. 5. Pigisanik agguaassisarnermut eqqartuussiviup aqutsisunut siusinnerusukkut ilaasortaasimasut maannamullu kukkunersiuksuusoq pigisanik agguaassisarnermut eqqartuussivimmut aggersarsinnaavai, imm. 4 malillugu paasissutissanik pissarsiffiginissaat siunertaralugu.

§ 118. Misussueqqissaartut aningaasaateqarfinnut oqartussanut allakkatigut nalunaarusiaminni aningaasaateqarfiup inuussutissarsiutitut ingerlatap atuukkunnaarsinneqarnissaanik kaammattuuteqarnerat misussueqqissaarnerup § 25 malillugu aallartinneqartup kingunerippagu, misussueqqissaartut nalunaarusiaata assilineqarneranik tigusinnermiit siulersuisut sapaatit akunneri sisamat qaangiutsinnagit siulersuisunik ataatsimiigiaqqusissapput, qulequtaq oqaluuserineqartussaattillugu.

Imm. 2. Siulersuisut siulersuisunik ataatsimiigiaqqusinnngippata, imaluunniit aningaasaateqarfimmik imm. 1 malillugu atuukkunnaarsitsiniarnatik siulersuisut aalajangerpata, aningaasaateqarfiup §§ 115-117-mi maleruagassat malillugit pinngitsaaliissummik atuukkunnaarsinnissaa aningaasaateqarfinnut oqartussat sulissutigisinnaavaat.

Aallarteqqinneq nangeqqikkallarnerlu

§ 119. Aningaasaateqarfik inuussutissarsiutitut ingerlataq aallarteqqissasoq aalajangerneqarsinnaavoq, atorunnaarsitsinnermi iluanaarutini § 114 malillugu agguaassineq sulii aallartinneqarsimanngippat. Peqqussut manna malittarisassallu malillugit siulersuisunik kukkunersiuksuullu toqqaasoqarnissaa, aningaasaateqarfiullu tunngaviusumik aningaasaataasa pigineqarnerat pillugu naliliisartup nalunaarutaata § 33, imm. 2 malillugu suliarineqarnissaa aallarteqqinnissamut piumasaqaataavoq. Tamatuma kingorna tunngaviusumik aningaasaatit, § 31-mi piumasarineqartunit ikinneruppata, aningaasaatit minnerpaamik taakkunatut amerlassuseqartunut amerlineqassapput.

Imm. 2. Pissutsit atorunnaarsitsinissamik aalajangernermik kinguneqartut maanna atuukkunnaarsimasut atorunnaarsitsilernerup nalaani paasinarsippat, imm. 1-mi aalajangersakkat aamma atuutissapput. Taamatut pisoqartillugu atorunnaarsitsilernerup unitsinneqarnissaa aningaasaateqarfiullu nutaamik suleqqilernissaa atorunnaarsitsisartup aalajangersinnaavaa.

Imm. 3. Imm. 1 imaluunniit 2 malillugu aallarteqqinnissamik aalajangerneq

anigaasaateqarfinnut oqartussanit akuersissutigineqassaaq. Aallarteqqinnissamik aalajangerneq nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1.

§ 120. Anigaasaateqarfik inuussutissarsiutitut ingerlataq pigisanik agguaassisarnermut eqqartuussivimmi atuukkunnaartussatut suliarineqarnermi nalaani, pigisanik agguaassisarnermut eqqartuussivimmi suliarinninnerup unitsinneqarnissaa, anigaasaateqarfiullu aallarteqqinnissaa § 12, imm. 1 malillugu nalunaarsorpagu nalunaarsorneqartussatulluunniit nalunaarutigippagu § 119 assigisaanik atorineqassaaq.

Imm. 2. Anigaasaateqarfik pinngitsaaliissummik atuukkunnaartussatut ingerlateqqinneqarsimappat, pissutsit pinngitsaaliissummik atuukkunnaarsitsinissamut tunngaviliisut iluarsineqarsimanissaat anigaasaateqarfiup aallarteqqinneqarnissaanut piumasaqaataavoq. Kingusinnerpaamik aallarteqqinnissamut aalajangernerup peqatigisaanik iluarsiisoqassaaq, tak. § 119, imm. 1. Pissutsit iluarsineqarsimanerannik uppenarsaatit kingusinnerpaamik imm. 1. malillugu nalunaarsuinerup nalunaarsorneqarnissamilluunniit nalunaaruteqarnerup peqatigisaanik nassiunneqassapput. Piffissami aallarteqqinnissamik qinnuteqarnermi ukiunut naatsorsuiffiusunut tunniussinissamut piffissaliussat naareersimasunut, ukiumoortumik nalunaarusiat anigaasaateqarfiup suli tunniussimanngippagit, ukiumoortumik nalunaarusiat taakku tiguneqarnissaat assigisaanik aallarteqqinnissamut piumasaqaataavoq.

Imm. 3. Pigisanik agguaassisarnermut eqqartuussivik atorunnaarsitsisartumik toqqaasimappat, aallarteqqinnissamut taanna isumaqataassaaq.

§ 121. Anigaasaateqarfiup inuussutissarsiutitut ingerlatap pigisaasa atorunnaarsitsinerup naammassineqarnerata kingorna Erhvervsstyrelsen qarasaasiaqarfianit peerneqarsimasut, tak. § 114, imm. 3, anigaasanik amerlanerusunik agguaanneqartussanik saqqummertoqarpat nangeqqikkallarneqarnissaat pigisanik agguaassisarnermut eqqartuussiviup aalajangersinnaavaa. Anigaasaateqarfiup atorunnaarsimasup pigisaasa nangeqqikkallarneqarnissaannut tunngaviliisunik pissutsinik allanik atuuttoqarpat, nangeqqikkallartitsisoqarnissaa pigisanik agguaassisarnermut eqqartuussiviup ilanngullugu aalajangersinnaavaa.

Imm. 2. Siusinnerusukkut atorunnaarsitsisusup pigisat suliarinerat isumagissavaa. Taamatut pisoqarsinnaanngippat, pigisanik agguaassisarnermut eqqartuussiviup imaluunniit atorunnaarsitsisartup, pigisanik agguaassisarnermut eqqartuussivimmit toqqaasup pigisat suliarinerat isumagissavaa.

Imm. 3. Pigisanik suliarinninnerup nangeqqikkallarnera taassumalu naammassinera pigisanik agguaassisarnermut eqqartuussiviup tamanna pillugu aalajangerneraniit kingusinnerpaamik sapaatit akunnerisa taallimat qaangiunneranni Erhvervsstyrelsen qarasaasiaqarfiani nalunaarsorneqassaaq nalunaarsorneqarnissamulluunniit nalunaarutigineqarluni.

Akiliisarnermik unitsitsinermut akiliisinnaajunnaarnermilluunniit ikaarsaariarneq

§ 122. Akiliisarnerup unitsinneqarnissaanik akiliisinnaajunnaarnermilluunniit qinnuteqaat taamaallaat anigaasaateqarfik sinnerlugu siulersuisunit, anigaasaateqarfinnut oqartussanit imaluunniit anigaasaateqarfik atorunnaarsinneqalerpat, atorunnaarsitsisartumit tunniunneqarsinnaavoq. Pigisanik agguaassisarnermut oqartussat Erhvervsstyrelsen nalunaarsuinermut oqartussatut akiliisarnerup unitsinneqarneranik akiliisinnaajunnaarnermilluunniit nalunaarfigissavaa.

Imm. 2. Atorunnaarsitsineq akiligassaqarfinnut tamakkiisumik akiliinermik kinguneqassanngitsoq atorunnaarsitsisartup paasiguniuk, atorunnaarsitsisartup akiliisarnermik unitsitsinissaq akiliisinnaajunaarnerluunniit qinnuteqaatigissavaa.

Imm. 3. Anigaasaateqarfik § 115, imm. 3 malillugu pinngitsaaliissummik atorunnaarsinneqalerpat, akiliisarnermik unitsitsinissamik akiliisinnaajunnaarnermilluunniit qinnuteqaat atorunnaarsitsisartup tunniutissavaa. Atorunnaarsitsisartumik toqqaasoqarsimanngippat,

pigisanik agguaassisarnermut eqqartuussiviup akiliisarnermik unititsinissaq akiliisinnaajunnaarnerluunniit nammineerluni aalajangersinnaavaa.

Imm. 4. Akiliisinnaajunnaarnissamik qinnuteqaat tunniunneqarsimappat, aningaasaateqarfik pillugu pissutsit nalunaarsugaasut pillugit allannguisoqarnissaanik aalajangiisoqarsinnaanngilaq, kukkunersiuisoq pigisanik agguaassisarnermut eqqartuussivimmit toqqagaasoq kattunnerluunniit pillugi nalunaarsukkat, tak. § 91, imm. 8, kiisalu § 106 malillugu aalajangersagaasinnaasut kisiisa pinnagit.

Imm. 5. Aningaasaateqarfimmi pilersitseqqiisartup aqutsiffigilersimasaani, aningaasaateqarfik pillugu nalunaarsukkat allanngortinneqarnissaat pillugu aalajangiisoqarsinnaanngilaq, kukkunersiuisoq pilersitseqqiisartumit toqqagaasoq pillugu allannguinerit kisiisa pinnagit.

§ 123. (Imm. 1 Kalaallit Nunaanni atuutsinneqalissanngilaq).

Imm. 2. Aningaasaateqarfiup akiliisinnaajunnaartutut suliarineqartup atini attatiinnassavaa »akiliisinnaajunnaartoq«-mik ilallugu.

Imm. 3. Akiliisinnaajunnaarnerup naammassinera Erhvervsstyrelsip qarasaasiaqarfiani nalunaarsorneqassaaq, pigisanik agguaassisarnermut eqqartuussiviup nalunaarutaani allamik allassimasoqanngippat.

Kapitali 13

Aningaasaateqarfiup inuussutissarsiutitut ingerlatap aamma aningaasaateqarfiup inuussutissarsiutitut ingerlataanngitsup akornanni ikaarsaariarneq il.il.

§ 124. Aningaasaateqarfik atuuttoq peqqussummut matumunnga ilaatinneqalerpat, imaluunniit peqqussummit matumannga ilaatinneqannginnissamut piumasaqaatit atuukkunnaarpata, tamanna nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Nalunaarsuinermit nalunaarsorneqarnissamulluunniit nalunaarummut siulersuisut nassuiaataat ilanngunneqassaaq, tassani aningaasaateqarfiup peqqussut manna malillugu nalunaarsorneqartussatut pisussaaffeqalersimasutut nalilernerqarnera tunngavilersorneqassalluni.

Imm. 2. Aningaasaateqarfik peqqussut manna malillugu nalunaarsorneqartussatut pisussaaffeqarneris Erhvervsstyrelsip aalajangissavaa. Aningaasaateqarfiup pioreersup aningaasaateqarfittut inuussutissarsiutitut ingerlatatut nalunaarsorneqarnerani kapitali 5, § 27 kisiat pinnagu atorineqassanngilaq.

§ 125. Aningaasaateqarfiup inuussutissarsiutitut ingerlatap peqqussummut matumunnga ilaatinnera unippat, tamanna nalunaarsorneqassaaq nalunaarsorneqarnissamulluunniit nalunaarutigineqarluni, tak. § 12, imm. 1. Nassuiaat aningaasaateqarfiup peqqussummut matumunnga suna pissutigalugu ilaajunnaarsimasutut nalilernerqarnerannik tunngavilersuisoq nalunaarsuinermit nalunaarummulluunniit ilanngussatut ilanngunneqassaaq.

Imm. 2. Aningaasaateqarfik peqqussummut matumunnga ilaatinneqarunnaarpata, aningaasaateqarfik aningaasaateqarfiit inuussutissarsiutitut ingerlatat nalunaarsorneqarfiannit peerneqassaaq. Erhvervsstyrelsi Civilstyrelsi tamatuminnga ilisimatissavaa.

Kapitali 14

Taarsiissutit

§ 126. Pilersitsisut aqutsisunullu ilaasortat, suliaminnik suliarinninnerminni piaaralutik mianersuaalliorlutilluunniit aningaasaateqarfimmik inuussutissarsiutitut ingerlatamik

ajocuusiimasut, tamatumunnga taarsiissuteqarnissamut pisussaaffeqarput. Inummik pingajuusumik ajoquusiisoqarsimappat, assigisaa atuuppoq.

Imm. 2. Kukkunersuiusut, naliliisartut misissueqqissaartitalluunniit taarsiissuteqarnissamut pisussaaffiat eqqarsaatigalugu, imm. 1-imi aalajangersagaq assigisaanik atorneqassaaq.

Imm. 3. Kukkunersuiusut piginneqatigiiffiat kukkunersuiusutut qinerneqarsimappat, kukkunersuiusut piginneqatigiiffiat kukkunersuiisorlu kukkunersuiutitaasoq taarsiissuteqarnissamut pisussaataapput.

§ 127. Aqutsisunut ilaasortat, kukkunersuiusut, naliliisartut, misissueqqissaartit pingajuusorluunniit akerleralugit § 126, imm. 1, oqaaseqatigiit siulliit malillugit eqqartuussivitsigut suliaasiinissamut aalajangiinerit, siulersuisunit aningaasaateqarfinnulluunniit oqartussanik aalajangerneqarsinnaapput.

§ 128. § 126 malillugu taarsiissutit ikilineqarsinnaapput, tamanna pisuutitaanerup qanoq sakkortutigineranut, ajoquusiinerup qanoq annertutigineranut pissutsillu sinnerinut naleqqiullugu naammaginartutut isigineqarpat.

Imm. 2. Arlallit peqatigiillutik taarsiissuteqarnissamut pisussaaffeqarpata, pineqartut nammaqatigiillutik taarsiissutitut akiliinissamut pisussaaffeqarput. Imm. 1-imi maleruagassat malillugit kinaluunniit taarsiissuteqarnissamut pisussaaffik sakkukillineqarsimappat, pineqartoq taamaallaat aningaasanik ikilisinneqartunik taarsissuteqarnissamut akisussaasuvoq. Taarsiissuteqarnissamut pisussaasut arlaata ataatsip taarsiissutit akilersimagunigit, pineqartup akisussaaqataasunut ataasiakkaanut tamanut imminerminnut agguassat akileqqusinnaavai, ataasiakkaat qanoq annertutigisumik pisuutitaanerut pissutsillu allat mianeralugit.

§ 129. Aqutsisut, kukkunersuiusut, naliliisartut misissueqqissaartitalluunniit akerleralugit eqqartuussivitsigut suliaasiissutit piffimmi aningaasaateqarfiup angerlarsimaffigisaani eqqartuussivimmu suliaasiissutigineqarsinnaapput.

Kapitali 15

Naammagittaalliorsinnaaneq

§ 130. Aalajangiinerit, aningaasaateqarfinnut oqartussat imaluunniit Erhvervsstyrelsi nalunaarsuinnermut oqartussat peqqussut manna, imaluunniit aalajangersakkat peqqussut manna malillugit aalajangersagaasut malillugit aalajangigaasut, aalajangiinerup pineqartumut nalunaarutigineqarneraniit kingusinnerpaamik sapaatit akunnerisa arfineq marluk qaangiunneranni Erhvervsankenævni suliaasiissutigineqarsinnaapput. Aalajangiinerit Erhvervsankenævni suliaasiissutigeqqaarnagit eqqartuussivinnut suliaasiissutigineqarsinnaapput.

Imm. 2. Piffissaliussamilli § 16, imm. 1 malillugu aalajangersaaneq, aamma piffissaliussap sivitsorneqarneranik § 12, imm. 4 malillugu akuerineqarneq, kiisalu § 17, imm. 1, § 24, imm. 3, § 25, § 60, imm. 2, aamma § 75 malillugit aalajangiinerit ingerlatsisutut oqartussanut qaffasinnerusumut suliaasiissutigineqarsinnaanngillat.

Kapitali 16

Pineqaatissiissutit il.il.

§ 131. Inatsisit allat malillugit sakkortunerusumik pineqaatissinneqarluni pisuutitaasimanngikkaanni, Erhvervsstyrelsi qarasaasiaqarfiani nalunaarsuineq aamma § 62,

imm. 2 malillugu nalunaarutunik, nalilersuinnermit nalunaarusianik nassiussineq, kiisalu aningaasaateqarfinnut oqartussanut imaluunniit Erhvervsstyrelsimut nalunaarsuinnermut oqartussatut nalunaarutit pillugit peqqussummi matumani aalajangersakkanik unioqqutitsinnermi akiliisitsineq eqqartuussutaasassaaq.

Imm. 2. Aqutsisunut ilaasortat, kukkunersiuusup atorunnaarsitsisartulluunniit peqqussut manna malillugu Erhvervsstyrelsimut nalunaarsuinnermut oqartussatut imaluunniit aningaasaateqarfinnut oqartussanut pisussaaffitik piffissaagallartillugu eqqortinnigipatigit, Erhvervsstyrelsip nalunaarsuinnermut oqartussatut imaluunniit aningaasaateqarfinnut oqartussat ullukkaartunik imaluunniit sapaatit akunnikkaartunik akiliisitsisarnerit pineqartunut pinngitsaaliissutitut pisussaaffiliutsissinnaavaat.

§ 132. §§ 5-imik, 13-mik 15-millu, »§ 21 a, imm. 3, 5 aamma 6 § 26, imm. 2-mik, § 34, imm. 2-mik, § 37, imm. 3-5-imik, § 38-mik, § 42, imm. 3-mik, §§ 49-51-mik, § 52, imm. 3-mik, § 53, imm. 4-mik, § 54-mik, §§ 56-59-mik, § 61-imik, § 62, imm. 1-imik, §§ 63-imik aamma 65-67-imik, § 76, imm. 2-mik, § 77-imik, § 78, imm. 1-imik imm. 6-imilu oqaaseqatigiit sisamannik, § 80-imik, § 83 oqaaseqatigiit sisamannik, § 85-imik, § 86, imm. 4-mik, § 87-imik, § 116, imm. 2-mi aamma §§ 117-mik 123-125-millu unioqqutitsinnermut akiliisitsineq eqqartuussutaassaaq. Atuinnerit § 87 akerlerralugu pilersitaasut attatiinnerannut akiliisitsineq eqqartuussutaassaaq.

Imm. 2. Inatsisit allat malillugit sakkortunerusumik pineqaatissinneqarluni pisuutitaasimangikkaanni, kinaluunniit siulersuisut § 56, imm. 2, oqaaseqatigiit siulliit malillugit elektronik atorlugu ataatsimiinnerannut malinnaaniarluni peqataaniarluniluunniit, ilanngullugu elektronik atorlugu taaseqataaniarluni qarasaasiamut isissutissamik allatigulluunniit isissutaasinnaasumik pisinnaatitaaffiginagu ingerlatitseqqittoq atuisorluunniit akiliisitaanermik eqqartuunneqassaaq.

Imm. 3. Inatsisit allat malillugit sakkortunerusumik pineqaatissinneqarluni pisuutitaasimangikkaanni, kinaluunniit elektronik atorlugu nalunaarutunik il.il., elektronik atorlugu attaveqatigiinneq pillugu § 56, imm. 3-mi aalajangersakkamut ilaatinneqartunik atuarniarluni, allangortitsiniarluni nassiussinianiarluniluunniit atugassatut qarasaasiamut isissutissamik allatigulluunniit isissutaasinnaasumik pisinnaatitaaffiginagu ingerlatitseqqittoq atuisorluunniit akiliisitaanermik eqqartuunneqassaaq.

Imm. 4. Najoqqutassani, peqqussut manna malillugu aalajangersagaasuni, najoqqutassani aalajangersakkanik unioqqutitsinnermi akiliisitsinnermik pineqaatissiisoqartarnissaa aalajangersarneqarsinnaavoq.

Imm. 5. Piginneqatigiiffiit il.il. (inatsisitigut pisinnaatitaasut pisusaatitaasullu) pinerluttulerinnermi inatsimmi kapitali 5-imi maleruagassat malillugit pinerluttulerinnermi inatsisitigut akisussaataallutik eqqartuunneqarsinnaapput.

Imm. 6. Peqqussummi aalajangersakkanik imaluunniit maleruagassanik peqqussut malillugu suliarineqartunik unioqqutitsinnerit pisoqalisoorinnassannut ukiut tallimat piffissarititaapput.

Kapitali 17

Atuutilersitsineq ikaarsaariarnermilu aalajangersakkat

§ 133. Peqqussutit matuma atuutilersinneranut piffissaliussaq inuussutissarsiornermut ineriartortitsinnermullu ministerip aalajangersassavaa, taamaattoq tak. imm. 2-14. Peqqussutit immikkoortuisa assigiinngitsut ilaasa piffissani assigiinngitsuni atuuttussanngortinnissaat inuussutissarsiornermut ineriartortitsinnermullu ministerip ilanngullugu aalajangersarsinnaavaa. (Oqaaseqatigiit aappaat Kalaallit Nunaanni atuutsinneqalissannigilaq).

Imm. 2. Aningaasaateqarfiit inuussutissarsiutitut ingerlatat pillugit inatsisip Kalaallit Nunaanni atuutsinneqalernissaa pillugit peqqussutip nr. 621, 23. juni 2008-meersup atorunnaarsinneqarnissaanut inuussutissarsiornermut ineriartortitsinermullu ministeri peqatigisaanik piginnaatinneqassaaq. Maleruagassat aalajangersimasut aningaasaateqarfiit inuussutissarsiutitut ingerlatat pillugit inatsisip Kalaallit Nunaanni atuutsinneqalernissaa pillugu peqqussut nr. 621, 23. juni 2008-meersumiittut ilaasa peqqussummi matumani maleruagassanit taarserneqarnissamik tungaannut atuuttuarallarnissaat inuussutissarsiornermut ineriartortitsinermullu ministerip ilanngullugu aalajangersinnaavaa.

Imm. 3. Aningaasaateqarfiit inuussutissarsiutitut ingerlatat pillugit inatsisip Kalaallit Nunaanni atuutsinneqalernissaa pillugu peqqussut nr. 621, 23. juni 2008-meersoq malillugu allaffissornikkut najoqqutassat allanngortinneqarnissamik atorunnaarsinneqarnissamilluunniit tungaanut atuutissapput.

Imm. 4. § 5, imm. 1 aamma 3, aamma §§ 28, 30 aamma 40 aningaasaateqarfimmut inuussutissarsiutitut ingerlatanut 1. januar 1985 sioqqullugu pilersinneqartunut atuutinngilaq. (Oqaaseqatigiit aappaat Kalaallit Nunaanni atuutilersinneqassanngilaq).

Imm. 5. Inatsit manna atuutileriarpat siulersuisut siullermik ataatsimiinneranni malittarisassat il.il. peqqussummut matumunnga siulersuisut naapertuuttunngortissavaat, taamaattoq tak. imm. 6-14.

Imm. 6. Peqqussut manna atuutileriarpat siulersuisut siullermik ataatsimiinneranni siulersuisut katitigaanerat siulersuisut § 37, imm. 3-mut 5-imullu naapertuuttunngortissavaat. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat peqqussutip matuma atuutilerneranit kingusinnerpaamik ukiut sisamat qaangiunneranni 37, imm. 3-mut 5-imullu naapertuuttunngortinneqassaaq.

Imm. 7. Aningaasaateqarfinni inuussutissarsiutitut ingerlatani, peqqussutip matuma atuutilersinneqarnera sioqqullugu pilersinneqartuni, aningaasaateqarfiup suliffeqarfinni pigisaani, suliffeqarfimmilu piginngisami, kisiannili aningaasaateqarfiup suliffeqarfiulluunniit taassuma pigisaata ingerlatsinikkut aningaasaqarnikkullu aqutsinermi annertuumik sunniuteqarfigisaani aqutsisut assigisaanilluunniit suliaqartitat aamma aqutsisunut ilaasortat assigisaanilluunniit suliaqartitat siulersuisunut ilaasortanik ikinnerussuteqartunik toqqaappata, siulersuisunut ilaasortat katitigaanerisa § 37, imm. 4-mut siulersuisunit naapertuuttunngortinnissaat piumasaqaataanngilaq. Aningaasaateqarfinni inuussutissarsiutitut ingerlatani, peqqussutip matuma atuutilersinneqarnera sioqqullugu pilersinneqartuni, aningaasaateqarfiup suliffeqarfinni pigisaani, suliffeqarfimmilu piginngisami, kisiannili aningaasaateqarfiup suliffeqarfiulluunniit taassuma pigisaata ingerlatsinikkut aningaasaqarnikkullu aqutsinermi annertuumik sunniuteqarfigisaani aqutsisut assigisaanilluunniit suliaqartitat aningaasaateqarfiup siulersuisuinut ilaasortanik ikinnerussuteqartunik toqqaasarpata, siulersuisunut ilaasortat oqaaseqatigiinnut siullernut naapertuuttunngortinneqassapput, taamaasilluni inuit pineqartut taamaallaat siulersuisuni ilaasortanik ikinnerussuteqartunik toqqaasassallutik. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat kingusinnerpaamik peqqussutip matuma atuutilerneraniit ukiut marluk qaangiunneranni oqaaseqatigiinnut siullernut naapertuuttunngortinneqassaaq.

Imm. 8. Siulersuisunit ilaasortat amerlanerussuteqartut suliffeqarfimmi aningaasaateqarfiup pilersitaani aqutsisunut ilaasortaappata, siulersuisut katitigaanerat § 40, imm. 2, oqaaseqatigiit aappaannut naapertuuttunngortinneqassaaq. Piffissat toqqagaaffiusut ingerlalereersut ataqqineqassapput, taamaattoq siulersuisut katitigaanerat peqqussutip matuma atuutilerneraniit kingusinnerpaamik ukiut marluk qaangiunneranni § 40, imm. 2, oqaaseqatigiit aappaannut naapertuuttunngortinneqassaaq.

Imm. 9. Siulersuisut ingerlatsisuminnik isumaqatigiissuteqarsimappata, isumaqatigiissut peqqussutip matuma atuutilerneraniit kingusinnerpaamik ukiup ataatsip qaangiunnerani § 43-mut naapertuuttunngortinneqassaaq.

Imm. 10. Peqqussutip matuma atuutilerneraniit kingusinnerpaamik ukiup ataatsip qaangiunnerani suleriaatsimut malittarisassat siulersuisut suliarissavaat, tak. § 50.

Imm. 11. Taasinerit amerlaqatigiitsillugit siulittaasup taasinera, siulittaasullu peqannginnerani siulittaasup tulliaata taasinera aalajangiisuussanersoq peqqussutip matuma atuutilerneraniit kingusinnerpaamik ukiup ataatsip qaangiunnerani siulersuisut aalajangiiffigissavaat, tak. § 53, imm. 3, tak. § 52, imm. 1.

Imm. 12. Kukkuersiuisumik toqqaaneq pillugu § 69-imi aalajangersagaq tamatumunngaluunniit atatillugu malittarisassani allannguisariaqarnerit kingusinnerpaamik peqqussutip matuma atuutilernerata kingorna ukiumoortumik naatsorsuutit ataatsimiissutigineranni siullermi eqqortinneqassapput.

Imm. 13. Aningaasaateqarfiit inuussutissarsiutitut ingerlatat pillugit inatsisip Kalaallit Nunaanni atuuttussanngortinneqarnissaa pillugu peqqussummi nr. 621, 23. juni 2008-meersumi § 39-mut ilaatinneqartut kingusinnerpaamik peqqussutip matuma atuuttussanngortinneranit ukiut marluk qaangiunneranni kukkuersiuisumik akuerisamik toqqaassapput, malittarisassanilu allannguutaasinnaasut pisariaqartut suliaralugit. Taamatut pisoqanngippat, aningaasaateqarfiup pineqartup § 3, imm. 2-mut ilaatitaannginnissani aningaasaateqarfinnut oqartussanut qinnuteqaatigissavaa.

Imm. 14. Kapitali 11 kattunnermut tunngasoq kattunnernut sulissutigineqalereersunut atorneqassanngilaq, taakkunani Erhvervsstyrelsen nalunaarsuinnermut oqartussatut, aningaasaateqarfiit inuussutissarsiutitut ingerlatat atorunnaarsitaasarnert pillugu nalunaarut (atorunnaarsitsineq, akiliisinnaajunnaarneq, pinngitsaaliisummik atorunnaarsitsineq aamma kattunneq) (Atorunnaarsitsisarnermik nalunaarut) nr. 781, 10. juli 2008-meersumi § 17 malillugu kattunnissamut pilersaarummik tigusisimanini tamanut saqqummiutereersimappagu. Kattunnernut sulissutigineqalereersunut oqaaseqatigiinnut siullernut ilaasunut, atorunnaarsitsisarnermik nalunaarummi maleruagassat atorneqassapput.

Imm. 15. Ikaarsaariarnermut aalajangersakkat imm. 5-14-imi taaneqartut saniatigut inuussutissarsiornermut ineriartortitsinermullu ministeri maleruagassanik allanik aalajangersaasinnaavoq, peqqussummi matumani aalajangersakkanik atuilernissamut ikaarsaariarneq pisariillisinniarlugu pisariaqartitat annertussusii apeqqutaatillugit.

Kapitali 18 (Ilaatinneqanngilaq)

Kapitel 19 (Ilanngunneqassanngilaq)

Inuussutissarsiutinik ingerlatsisutut aningaasaateqarfiit pillugit allannguutitut inatsisini assigiinngitsuni aalajangersakkat ilaasa Kalaallit Nunaannut atuutilersinneqarnerat pillugu peqqussut nr. 2626 28. december 2021-meersoq atuutilersinneqarnissanut atuutilersikkiartuaarnissaanullu aalajangersakkat imaapput:

§ 3.

Imm. 1. Peqqussutip atulersinneqarneranut piffissaq Erhvervsministerip aalajangissavaa, tamatumunngalu ilagitillugu piffissani assigiinngitsuni peqqussutip ilai assigiinngitsut atuutilersinneqarnissai aalajangersarsinnaallugit.

Imm. 2. Aningaasaateqarfinnut peqqussummut ilaatinneqartunut, aamma aningaasaateqarfiit

immikkoortortaanni aqutsisuusunut taakkualu suliaasaannut ikaarsaarnermi aaqqiissutit pillugit maleruagassanik Erhvervsministeri aalajangersaasinnaavoq.

Imm. 3. Maleruagqusat inatsit malillugu atuutilersinneqartut Kalaallit Nunaannut atuutinngillat.

Erhvervsstyrelsen, ulloq 16. september 2025
JØRGEN WISSING JENSEN

/Søren Corfixsen Whitt

¹ Inatsit nr. 722, 25. juni 2014-imeersumi § 136 aalajangersakkamik matuminnga imaqarpoq: "Inatsit Savalimmiunut Kalaallit Nunaanni atuutinngilaq, kunngilli peqqussutaatigut Kalaallit Nunannut tamakkiisumik ilaannakortumilluunniit atuuttunngortinneqarsinnaavoq, Kalaallit Nunaanni pissutsit pisariaqartitaannik allannguutitalerlugu."

² Inatsit nr. 738, 1. juni 2015-imeersumi § 9, imm. 2 aalajangersakkamik matuminnga imaqarpoq: "Inatsit kunngip peqqussutaatigut Kalaallit Nunaanni tamakkiisumik ilaannakortumilluunniit atuuttunngortinneqarsinnaavoq, Kalaallit Nunaanni pissutsit pisariaqartitaannik allannguutitalerlugu."